


# BANSUNGI SAMBWADI

## YA DIBUUNDU

 . . .Mfumu Yesu ya kusakumuka. Mpe ya ke na kivuvu ya nene yina mu ke tala na ntwala na bankokila yayi ya lukutakanu, na kusalaka kivuvu ti na mutindu nyonso, na mutindu mosi, ti Tata ya beto ya Mazulu ke kulumusa balusakumunu ya Yandi na zulu ya beto. Mpe bambala mingi mu ke kuzwaka ntangu ya mbote na kuzwa balukutakanu yayi awa na—na dibuundu, na nkonga, beno nkonga ya fyoti, kimvuka yina kele bamambeke awa ya dibuundu, mpe banzenza, ya kieleka.

<sup>2</sup> Mpe yayi ba zabisaka yawu ve. Ya vwandaka kaka lukutakanu ya bisambu ya Kilumbu ya tatu na nkokila. Mpe mu tubaka, “Mu banza ti na nkokila yayi beto ke mona kana beto ke vutuka.” Mpe mu banzaka ti beto ke baka yawu, mu banza, mpe zabisaka yawu na sabala ke kwisa, na yina, ya ke. . .Beto lenda ve kuvwandisa bantu mingi awa.

<sup>3</sup> Mpe mutindu ya balukutakanu yayi, kana Nzambi kuzola, kele ve ya kuludika na. . .Ya kele ya kuludika na Dibundu, samu na ndandu ya Dibundu, kisika beto ke kuwa ti ya kele nene mingi na nsatu ya ntangu, bisika nyonso, kele, mpe, samu na Nzutu ya Klisto. Mpe, ntangu yayi yayi, na kati ya malongi. Mu vwandaka na balukutakanu ya kubeluka ya nzutu bamvula nana, mbala mosi; mpe na manima, kulonga, ya ke vwanza mutindu kima ya malu-malu.

<sup>4</sup> Mpe mu vwandaka banza, na manima ya midi yayi, ntangu mu zibulaka Biblia, na manima ya kuvwanda kieleka na bisalu mingi na kilumbu. Mu banzaka, “Mbote, mu tubaka na bantu ti mu ke longa na zulu ya *Bansungi Sambwadi Ya Dibundu*, mu banza, kana Mfumu zola.” Mu bandaka na kutanga, mpe mu kuzwaka yawu, mu vwandaka na kiese mingi, ntangu mu bandaka na kutanga yawu. Mpe mu banzaka, “Mbote, mu lenda baka nyonso yina na nkokila mosi, na ngunga mosi.”

<sup>5</sup> Na yawu, mu zabaka ve yina Mpeve-Santu zolaka ti beto kusala. Beto, beto ke mekaka ve na kutula kima mosi. Ya kele kaka, “Kana ya kele luzolo ya Nge, Mfumu,” beno me mona. Ya kele ya kulutula mbote. Mpe na yina, kana ya ke vwanza luzolo ya Mfumu, mu ke zola kulonga na nkokila yayi na zulu ya bansungi ya dibuundu, mpe mbasi na nkokila na zulu ya *Kidimbu Ya Kibulu*, mpe na nkokila yina ke landa na zulu ya *Kidimbu Ya Nzambi*, mpe yina.

6 Mpe, na yina, Kilumbu ya sambanu. Oh, mpangi ya beto ya bakala, mukengi, vwandaka tuba kaka na munu, bubu yayi; yandi tubaka, “Kana ba kuzwaka yawu Kilumbu ya sambanu na nkokila mpe na Lumingu na suka, ntangu nionso, ntangu banzenza ke kwisaka na kati ya beto, na yina, dibuundu ke vwanda mvindu mingi, mpe nionso yina.”

7 Na yina ba ke banza ti ba kele kaka na Kilumbu ya tatu, na Kilumbu ya yiya, mpe na Kilumbu ya tanu, mpe na Lumingu na suka, na Lumingu na nkokila. Mpe mu tubaka, “Mbote, yina ke vwanda kieleka nyonso ya kulunga, landila mutindu mu me zaba dyambu.”

8 Na yawu kuna beto ke meka, kana Mfumu zola, kuzwa yawu na Kilumbu ya tatu, na Kilumbu ya yiya, na Kilumbu ya tanu, na Lumingu na suka, mpe na Lumingu na nkokila. Mpe, mu banza, na Lumingu na nkokila beto lendaka kuzwa lukutakanu ya mbotika, mutindu bantu vwandaka lomba yimeni na kuzwa mbotika. Mpe na yawu ntangu yayi. . .

9 Mpe beto ke meka, konso nkokila, na kubanda kaka na ntangu ya mbote, na ngunga ya sambwadi na ndambu. Mpe, mu ke mata na estrade na ngunga ya nana, beto fwana basika na tabernacle na ngunga ya yivwa na ndambu, kana Mfumu kuzola. Na yawu ti beno. . . Mu zaba ti beno ke salaka, mpe beto kele na buzitu na yawu.

10 Mpe ntangu yayi mwa Bansangu yayi na Buku ya Apocalypse me tadila Dibuundu. Mpe mu zola ti muntu nionso kusimba yayi na kati ya mabanza, ti ya me tadila ve nsambulu ya muntu mosi, to motifi yankaka; kaka, na luzabu ya munu ya kulutila mbote, na kutanga mpe kutendula Ndinga ya Nzambi. Beno me mona? Ya me tumama ve samu na motifi ya muyimi ya muntu mosi, to ya me tadila ve muntu mosi, muntu mosi, to dibuundu ya muntu mosi, nsambulu ya muntu mosi.

11 Mpe ya kele samu na yina mu ke zolaka kulonga na zulu ya luzayikisu yayi awa na tabernacle, na kuvwandaka dibuundu ya munu mosi, na yina, mu ke kuwa kaka mutindu mu kele na yinzo. Mpe—mpe mu kaka, beno zaba, mutindu ya kupesa mameme ya munu mutindu ya madia yina mu banzaka ti bawu vwandaka na yawu nsatu, beno zaba. Mwa. . .

12 Bantu, ntangu yankaka bawu fwana kutula mwa mungwa na kati ntangu luzerne kele fioti mbungi, beno zaba. Ya lendaka niongisa dimeme kana beno sala yawu ve. Na yina, na mbala mosi, ntangu mu banza luzerne ke kuma mwa mbungi fioti pene-pene ya dibuundu, mpe—mpe mwa baluswaswanu ke kwisa, na yina mu ke banza mwa mungwa, mutindu, kele luwu, beno ke banza mutindu yina ve? Ya ke kebaka bawu na yina na kubela.

13 Na yawu ntangu yayi beto ke sambila ti—ti Nzambi ke sakumuna beto na bangolo yayi. Mpe bantu yikwa. . .? Beno kuwa kaka, kaka mutindu babakala mpe bakento, mutindu beto

kele, Mu ke zola kutala yawu, mbasi na nkokila, na, “Yinki kele kidimbu ya kibulu?” Ya kele na mingi samu na yawu na kati ya Biblia. “Nani kele na yawu? Mpe nani ke kuzwa yawu?”

<sup>14</sup> Mpe na yina, yina ke landa, ya ke vwanda na ntangu yina ya ke vwanda. Mpe mu zaba ve, ya lendaka vwanda ntangu yayi. Beto ke tala mpe ke mona, yinga, ti, ya ke vwanda kaka na bakalasi zole ya bantu na zulu ya ntoto, mpe mosi ke vwanda ya kutula kidimbu na dyabulu, mpe yankaka yina kidimbu ya Nzambi. Mpe mu banza, ti kana beto me kuma pene-pene na ntangu yina, beto ke sala mbote na kutala bisika nionso, beno tala yina kima yina kele, samu ti kieleka ya ke kota kaka ve mutindu kima mosi ya nene. Biblia ke tuba ti ya ke kota na malembe, ti, “Ya ke vuna musolami ya kieleka kana ya lendaka salama.” Na yawu beto ke meka, kana Nzambi zola, na kutala yawu, mbasi na nkokila. Ntangu yayi, ya kele kaka ya kulutila mbote ya munu . . .

<sup>15</sup> Ntangu yayi, beno nata Biblia ya beno, mpe kilapi ya beno mpe papié, mpe beno zola baka Masonuku. Mpe, beno banza kaka ve ti ya kele kaka kieleka, beno sonika munu mwa noti mosi mpe beno tula yawu na zulu samu na nkokila yina ke landa.

<sup>16</sup> Mu ke bambuka moyo na kuvwandaka mvula mosi mpe bangonda sambanu na Buku yayi ya Apocalypse, na—na tabernacle awa. Ya kele yina mu zola, na—na malongi. Mu ke zolaka kaka kulonga. Oh, la la! Mu—mu—mu—mu banza ti ya kele mbote. Ya ke pesaka lufulu, mpe ke vwandisa dibuundu.

<sup>17</sup> Mpe, na kulonga, ntangu yayi, ya kele na bantu yina kele milongi. Bawu lenda baka Ndinga, na lutwadusu ya kimpeve, mpe kukotisa Yawu kuna na bisika. Ya kele na maza Bankuna yina mulongisi longaka. Beno me mona? Ntangu yayi, beno fwana tula Nkuna mosi na kati, ntete, mpe na manima kulosila Yawu maza. Mpe maza ke katukaka na kulonga ya Ndinga.

<sup>18</sup> Ya kele na luswaswanu ya nene, ya nene na kati-kati ya mulongisi mpe mulongi. Beno me mona? Ya kele makabu zole ya kuswaswana ya Mpeve, na nyonso, makabu zole ya kuswaswana. Mpe mu ke tuba yayi na kukikulumusa nionso, kasi, mu ke na dikabu mosi ve to yankaka ve.

<sup>19</sup> Kasi ya munu, mutindu ya mumesanu, ke sambila samu na bambevo. Yawu yina Mfumu me bokila munu na kusala. Mpe na yina, na ntangu yayi, ya ke pesa kupema na mabanza ya munu, samu na kulonguka kima mosi ya luswaswanu, ya vwandaka ve na balukutakanu ya kubeluka ya Kinzambi; kaka—kaka kulonga Ndinga. Mpe, oh, beto ke wisana kaka mbote awa. Beto . . . Mu ke bambuka moyo, beno tulaka munu ntangu ya yinda, pene ya bamvula kumi na zole awa, na zulu ya yawu.

<sup>20</sup> Mpe mu vwanda tubaka na . . . Mu vwanda zola kutuba yawu ve samu na kusakana, kasi, malongi kele ngolo mingi, Mu tubaka, “Ya kele kaka mutindu muntu ke kwenda na mesa mpe

ke kudya dimpa ya masangu mpe madeso.” Ntangu yayi, ya kele mbote samu na beno, kasi beno me lemba yawu fyoti, mbala mosi na mwa ntangu fyoti, ti beno lenda kuzwa kima na lweka, mwa creme ya galasi mpe gato, na mbala mosi, ya ke vwanda mutindu ya kuvwandisa mbote-mbote mutindu ya kudia. Kasi kima ya mbote ya mutindu ya ntama ke kangama na beno mbote mingi, mpe, na kutala, ya ke pesa beno mwa mbwetete.

<sup>21</sup> Ntangu yayi, na yayi, ya kele samu na kundima ya munu ya kukikulumusya yina beto ke na kuzinga na bilumbu ya nsuka ya disolo ya yinza. Mu zola kukumisa yawu kieleka pwelele. Ntangu yayi, mu lendaka vwanda na foti. Mu zaba ve. Muntu yankaka ve zaba. Yesu tubaka, “Ata mpe Bawanzio ya Mazulu ke zaba.” Yandi zabaka ve, Yandi mosi. Yandi tubaka, “Ya kele kaka na nzila ya Tata, ya kele kaka Yandi yina zaba.” Kasi ya kele kieleka mpe kieleka ti Yandi ke na kuvutukaka. Mpe mu lenda kaka ve kumona kima yankaka me bikana kasi ku- . . . Nkwizulu ya Mfumu.

<sup>22</sup> Ntangu, mu ke tala mpe mu ke mona, yinsi me bukana. Mu ke mona politiki me bukana. Mu ke mona bayinzo me kubwa. Mu ke mona dibuundu me bukana. Mu . . . Ya kele kaka na kima yankaka yina lenda mu zola yawu, kasi Nzambi, kaka yina, samu ti bawu kele na kima yankaka ve. Bankadulu ya yinsi me beba. Mpe bafeti ya politiki me bukana; kisika beto tulaka kivuvu mingi na bapolitiki ya beto; yawu me bukana.

<sup>23</sup> Mpe muntu mosi ya nene na Angleterre, ntama mingi ve, tubaka, “Mbote, démocratie vwandaka—vwandaka nyonso ya bavwale mpe ya kukondwa kizundu.” Yina tubaka, “Ya ke vwanda na ntangu yina ba ke vwanda na ba-bwati ya sabuni, ba ke soola.” Mbote, ya kele kieleka. Kasi yandi banzaka ve na Kivinga ya yandi mosi ya Bamfumu, wapi mutindu ya vwandaka bavwale mingi mpe tinta vwandaka ve, dyaka. Ya pumbukaka, dyaka.

<sup>24</sup> Mpe konso kimfumu ya yinza yayi ke bukana na bitini-bitini. Yesu Klisto ke yala mpe ke yala. Na yina ya kele:

Bivuvu ya munu kele ya kutunga na kima  
yankaka ve

Kulutila Menga ya Yesu mpe ludedomo;

Nyonso pene-pene ya moyo ya munu  
kwendaka,

Yandi kele kivuvu ya munu nyonso mpe  
kuvwanda ya munu.

Na Klisto, Ditadi ya ngolo, mu me telama;

Bisika yankaka nionso kele putulu.

<sup>25</sup> Mpe, oh, wapi mutindu mu zola ntangu yayi ti beto ke banda lukutakanu ya malongi pene ya bangonda tatu, samu beno kota na Buku ya Apocalypse mpe kukanga yawu na Daniel, vision ya nene.

<sup>26</sup> Bantu yikwa me bikana, na kati ya mwa mameme awa, yina vwanza bambuka moyo ntangu mu vwanza na charte ya ntama awa? Mu zaba ti Mpangi Head vwanza, mpe beto vwanza na mingi ya beno awa ntangu mu vwanza na charte ya ntama.

<sup>27</sup> Ntangu yayi, Buku ya Apocalypse, mutindu Yawu me salama. Mpe Daniel ke vukana na Yawu. Esaie ke vukana na Yawu. Ngwisani nyonso ya Ntama ke vukana na Yawu. Mpe Yawu kele Buku ya Luzayikisu ya Yesu Klisto. Beno me mona? Buku ya Apocalypse ya Yesu Klisto.

<sup>28</sup> Mpe kuna, na kati kuna, ya kele na Mabuundu Sambwadi, Bampasi Sambwadi, Bidimbu Sambwadi, Bampungi Sambwadi. Ntangu yayi, mpungi ke talisa mvita; kidimbu, mansweki ke ku- . . . ke zibuka; mpe mpasi kele yina ke landaka konso mvita.

<sup>29</sup> Mpe na lusalusu ya Nzambi, mpe na buku ya masolo, mu lenda siamisa na beno ti beto ke na kuzinga na Mpungi ya Sambwadi, samu na Mpasi ya Sambwadi, mpe Kidimbu ya Sambwadi ke zibuka, mpe Mbungu ya Sambwadi ke tiamuka.

<sup>30</sup> Ntangu muningu ya sambanu; beto ke zonzila yawu, mu banza, kutulama kidimbu, na Kilumbu ya tanu na nkokila. Ntangu Mvita ya Ntete ya Yinza, na yina, . . . Mpungi yina ya Sambanu kuwakanaka kulandila, kieleka landila ntangu Nzambi zonzilaka yawu. Ya kieleka, landila géographie, na kulandaka kidimbu na ntuala ya yawu. Mpe ntangu mansweki monisamaka kuna, samu na mbotika ya Mpeve-Santu; mpe— mpe bantu kuna, mutindu dibuundu vwanza mata ve; mpe bayina vwanza sala mangaka na kutambula na Nsemo, mpe vutukaka. Mpe mpasi zibukaka na ntangu yina, mpe tiamukaka na zulu ya ntoto, yina vwanza na yisi ya lutumu, yina kufwaka bantu nionso mutindu ya salaka, mafunda na mafunda.

<sup>31</sup> Mpe na manima beto me kota na nsungi yayi ya nsuka, kisika beto kele awa. Mpe beno kwisa kaka mpe beno kuwa yina Mfumu fwana tuba samu na yawu, na kati ya Ndinga ya Yandi. Ntangu yayi, yina kele ve kisika ya munu. Mu ke tanga kaka yawu mutindu zulunale, kaka na Ndinga ya Nzambi. Na yawu, Yayi kele luzayikisu ya Yandi na Dibundu, na Dibundu; Luzayikisu ya Yesu Klisto, na Dibundu.

<sup>32</sup> Ntangu yayi, ntete beto zonga na Yandi, to kuzonga na bisono ya Yandi, beto kulumusa bayintu ya beto mpe beto tuba na Yandi na mwa ntangu fioti na mpova ya kisambu.

<sup>33</sup> Tata ya beto ya Mazulu, na yina na luzitu beto ke kulumusa bayintu ya beto na putulu, kisika ba bakaka beto mpe ke vutuka kilumbu mosi, kana Nge ke wumela. Beto ke fukama na kukikulumusa, samu na kulomba ti Nge ke vwanza pene-pene ya beto, na nkokila yayi, samu na kusakumuna beto. Mu lenda vutula ba-page ya Biblia yayi, kasi ya kele ve na muntu yina lenda zibula Buku to kuzibula bidimbu ya yawu. Mpe ya kele

ya kusunama na kati Awa, “Yandi yina ke katula na Yayi, ba ke katula yandi, kitini ya yandi, ya Buku ya Luzingu; mpe nani ke bwela Yawu, bampasi ya Nzambi ke tiamuka na zulu ya yandi.”

<sup>34</sup> Tata, na kuzabaka, mutindu babakala mpe bakento yina kele ya kuvwanda awa na nkokila yayi, na kuzabaka ti beto kele bantu ya kukangama na Seko, Nzambi, bika ti Mpeve-Santu kukwisa, Nsoniki ya Biblia yayi, mpe kuzibula ba-page yayi na beto. Mpe bika ti kisadi ya Nge ya kukikulumusa, ya kukondwa mfunu kulonga mutindu muntu yina ke na kufwa na bantu yina ke na kufwa, mutindu kana yayi ke vwanda lukutakanu ya nsuka mu ke vwanda na lweka yayi ya Seko, mazono na nkokila beto ke vukana kintwadi. Mpe ti mosi na mosi ya misambidi kusala na nkokila yayi mutindu kana yayi vwandaka dilongi ya bawu ya nsuka yina bawu zolaka kuwa. Nzambi, katula bulawu nyonso. Sala beto ya kusungama, na kuzabaka ti beto fwana pesa mvutu na Lufundusu ya Nzambi, kilumbu mosi. Mpe nkadulu ya beto na ntuala ya Yandi mpe Ndinga ya Yandi, ntangu yayi, ke baka kisika ya beto ya nsuka ya Seko.

<sup>35</sup> Na yawu, Tata, na bantima ya kutekita, beto me kwiza na Nge, mpe me lomba. Bika ti Mfumu Yesu, na mutindu ya Mpeve-Santu, kubaka Ndinga ya Nzambi, na nkokila yayi, mpe kupesa Yawu na konso ntima, mutindu beto kele na yawu nsatu. Samu beto me lomba yawu na Nkumbu ya Yandi. Amen.

<sup>36</sup> Ya lendaka monana fioti ya ngitukulu samu na munu, mwa ntangu fioti ntangu yayi, samu na kumeka na kuzibula dilongi mosi samu na kulonga. Samu ti, ya ke vwandaka ntangu nyonso na zulu ya kubeluka ya Kinzambi bamvula fyoti me luta, mpe kuna, to, kuna, ve na zulu ya profesu, ata fyoti ve, mpe na yina—mpe na manima kukota na ndonga ya bisambu.

<sup>37</sup> Kasi ntangu yayi, na nkokila yayi, beto zola kuzwa lufulu ya Buku yina beto ke lomba na Nzambi na kuzibula samu na beto, ya kele Buku ya Luzayikisu ya Yesu Klisto.

<sup>38</sup> Buku yayi sonamaka pene ya mvula 96 na Manima ya Klisto, landila misoniki, mpe ya vwandaka Jean ya luzolo.

<sup>39</sup> Mpe yandi kuzwaka vision yayi na kisanga ya Patmos, kisanga na Mubu ya Egée, pene ya ba-kilometre kumi na tanu, to kima mosi, pene-pene ya yawu, na selekele, kisika ya kieleka ya matadi ya kifuluka na banioka, mpe nionso yina, kisika yinsi ya ba-Romain sadilaka yawu mutindu Alcatraz, mutindu beto zolaka kuzwa yawu bubu yayi, kisika mosi ya kingenga ya bantu yina ke kufwaka bantu yina luyalu lendaka ve kulandila.

<sup>40</sup> Mpe ba sonikaka Buku yayi na nzila ya mosi ya bantumwa ya Mfumu ya beto Yesu Klisto, kwikilaka na kuvwanda bantu ya luzolo yina pesamaka na ntulu ya Yandi na manima ya mvumbukulu; mpe Yandi tubaka, “Yinki ya kele diambu samu na nge kana yandi zinga tii mu ke kwiza?” Jean kufwaka, kiboba ya

bakala. Mosi na mosi ya bambangi kangaka kimbangi ya bawu na menga ya bawu mosi.

<sup>41</sup> Jean, dikani ya yandi salamaka mutindu yayi: Ba kangaka yandi, mpe ba tokisaka yandi na kati ya tonu ya mafuta bangunga makumi zole na yiya, ya mafuta ya tiya ke na kutoka, mpe kukondwa mpasi kukwiza na yandi. Mpe ba tulaka yandi na kisanga, mutindu ba vwandaka kwikila, ti yandi vwandaka ndoki, “Yandi singaka mafuta samu ti yawu kuyoka yandi ve,” bawu tubaka. Kieleka, ya vwandaka ngolo ya Nzambi, yina. Beno lenda ve kubasisa Mpeve-Santu na muntu. Samu na yinki! Na yawu bawu mekaka na kubasisa Yawu na yandi, kasi Nzambi zolaka ve kupesa muswa na yawu. Mpe Yandi vwandaka na kisalu samu na yandi na kusala. Mpe tii kuna Nzambi manisaka na muntu ya Yandi, ya kele na kima ve na yinza yina lenda kwamisa yandi. Kaka yina.

<sup>42</sup> Ntangu yayi, Jean na kuvwandaka kiboba, yandi...ba tubaka na bawu na bantu ya masolo, ti ba nataka yandi na—na dibuundu, samu na kulonga. Mpe yandi vwandaka kiboba mingi, kima kaka yina yandi zolaka tuba, vwandaka, “Bana ya fyoti, beno zolana mosi na yankaka.”

<sup>43</sup> Mu ke tuba na beno, ya kele kima ya mbote mingi na kulonga. “Bana ya fyoti, beno zolana mosi na yankaka.” Mutindu mu ke kuma kiboba, na ministere ntangu yayi, mpe munu...pene ya mvula ya munu makumi zole na mosi. Mu banza, ntangu nyonso yina mu ke kwenda, ti yayi...Kulutila mu ke banzaka na Mfumu Yesu, kulutila mu ke bandaka na kubakula ti ya kele zola yina ke fikaka kima ya muvimba. “Zola ya Nzambi, me mwangana na kati ya ntima ya beto na nzila ya Mpeve-Santu.”

<sup>44</sup> Ntangu yayi beto ke tanga kaka mwa banzila awa, samu na kuvwanda...kubanda, mpe kuna beto ke kota mbala mosi na malongi ya dibuundu. Mpe na yina beno meka na kunata yawu na kisika mosi, kana Nzambi zola, na ntangu yayi mu ke na yawu, samu na kunata yawu tii kisika beto lenda kuma kisika beto lenda baka, *Kidimbu Ya Kibulu*, samu ti mbasi na nkokila.

<sup>45</sup> Ntangu yayi, yayi kele samu na dibuundu. Ntangu yayi, mu ke meka na kubaka, na kutala, dibuundu ya Ephèse, dibuundu ya ntete, mpe dibuundu ya nsuka yina beto ke na kuzinga ntangu yayi, dibuundu ya Laodicée ntangu yayi.

*Luzayikisu ya Yesu Klisto, yina Nzambi pesaka na yandi, samu na kulakisa na bisadi ya yandi bima yina fwana salama ntama mingi ve; mpe yandi fidisaka wanzio ya yandi mpe pesaka kidimbu...fidisaka mpe talisaka yawu na nzila ya wanzio ya yandi na ntuala ya kisadi ya yandi Jean:*

<sup>46</sup> Ntangu yayi, Masonuku ke pesa beto kubanda awa. Ya kele, “Luzayikisu...” To, mpova *luzayikisu* zola kutuba “kima yina me monisama.” “Luzayikisu ya Yesu Klisto,” ba pesaka na Jean.

Mpe ba fidisaka wanzio samu na kupesa kimbangi, to samu na kusonika yawu.

*Mpe yandi pesaka kimbangi ya ndinga ya Nzambi, mpe ya kimbangi ya Yesu Klisto, mpe ya bima yina yandi monaka.*

*Kyese na yandi yina ke tanga, . . .*

<sup>47</sup> Bantu yikwa ke zola kuzwa lusakumunu? Na yina, beno tanga Yawu. Beno me mona, “yandi yina ke tanga.”

*Kyese na yandi yina ke tanga, mpe bayina ke kuwa bandinga ya profes, mpe ke bumba bima yango yina kele ya kusonama na kati kuna: samu ti ntangu me belama.*

<sup>48</sup> Na nzonzolo yankaka, ve na ntangu yayi na yina, kasi, “Ntangu me kuma pene-pene, ntangu ba ke mona Ndinga yayi me mana, ntangu Luzayikisu ya muvimba.”

<sup>49</sup> Ntangu Nzambi bandaka, mutindu artiste mosi ke benda foto ya kima mosi, Yandi ke banda na kufulusa na bitini ya Yandi. Beno lendaka banda na kumona yawu kusungama. Mpe na yina beno ke banda na ntete ya Buku ya Apocalypse, beno ke mona Yesu Klisto kubanda na kukota na foto. Mpe na nsuka ya Yawu, beno ke mona Yandi ya muvimba, ya kuvwanda na Dibuundu ya Yandi, yina ba me kembisa; bilumbu nyonso ya disumu mpe ya mpasi mpe bampukumunu me suka, mpe Klisto kele ya kuvwanda na Dibuundu ya Yandi, na Mazulu ya nene na zulu.

<sup>50</sup> Mbote mingi, nzila ya 4. Beno kuwa. “Jean na mabuundu. . .” Ntangu yayi, yayi kele Jean yina ke na kuzonzaka. Ntete, vwandaka Nzambi ke talisaka Luzayikisu ya Yesu Klisto. Ya zole:

*Jean na . . . mabuundu yina kele na Asie: Lemvo kuvwanda na beno, mpe ngemba, na yandi yina kele, mpe yina vwandaka, mpe yina ke kwiza; mpe na Bampeve sambwadi yina kele na ntuala ya Nzambi;*

<sup>51</sup> Oh, kana beto vwandaka kaka na tablo awa ntangu yayi, samu na kubaka dibanza, fyoti, beno me mona, “Bampeve sambwadi yina kele na ntuala ya Nzambi;”

<sup>52</sup> Ntangu yayi, samu na kuzwa mwa ntangu, mpe na kukwikilaka ti mu. . . na kuzabaka ti mu ke pesa ve kima ya yimbi, samu na kima mosi ve na yinza. Mpe kana beno kuzwa mwa ntembe samu na yawu, beno sonika yawu mpe na manima beno yufula munu, mpe mu ke pesa beno Masonuku samu na yawu. Mpe ntangu yayi na yina beto fwana sala nswalu samu na kukota na yayi, na yina beto me sala nswalu samu na ntangu.

<sup>53</sup> Ntangu yayi, “Bampeve sambwadi yina kele na ntuala ya Nzambi.” Bampeve sambwadi yayi talisamaka mutindu Bampeve sambwadi yina ba ke fidisa samu na Bansungi Sambwadi ya Dibuundu, “Bampeve sambwadi na ntuala ya



Nzambi.” Beto lendaka baka Ngwisani ya Ntama, mpe kubaka yawu kuna, kana beto vwandaka kaka na ntangu.

*Mpe na Yesu Klisto, yina kele mbangi ya kukwikama, mpe dikanda ya ntete ya bantu ya kufwa, mpe ntinu ya bantinu ya ntoto. Na yandi yina zolaka beto, mpe sukulaka beto. . .*

54 Oh, la la, beno tala kaka bamputa ya Jean kuna, ntangu yandi talaka. Yandi bandaka kaka na kutuba. Yandi tubaka:

*. . .-na yandi yina zolaka beto, mpe sukulaka beto na masumu ya beto na menga ya yandi mosi,*

*Mpe salaka beto bantinu mpe banganga-Nzambi samu na Nzambi. . . Tata ya yandi; samu na yandi kuvwanda nkembo mpe luyalu ya ntangu nyonso mpe ntangu nyonso. Amen.*

55 “Me sala beto banganga-Nzambi mpe bantinu samu na Nzambi.” “Beto” kele mingi. Ve “salaka munu nganga-Nzambi mpe ntinu mosi;” kasi, “salaka beto,” Dibuundu.

56 Ntangu yayi, yandi ke na kuzonzaka na mabuundu sambwadi yayi, samu ti ya kele Bansungi Sambwadi ya Dibuundu.

57 Ntangu yayi, yandi tubaka, “Luyalu mpe nkembo, mpe kuvwanda na Yandi mvula na mvula.”

58 “Me sala beto banganga-Nzambi.” Beno me zaba yina nganga-Nzambi kele, yinki kele ksalu ya yandi? Nganga-Nzambi ke sala munkayulu, samu na kubondila. Mpe kuna na Hébreux, Yawu tubaka ti beto, Dibuundu, kele kinganga-Nzambi ya kimfumu, “Kinganga-Nzambi ya kimfumu, yinsi ya santu, bantu ya luswaswanu.” Beno me mona? “Yinsi ya santu, bantu ya luswaswanu, kinganga-Nzambi ya kimfumu.” “Munkayulu,” yawu yayi ntangu yayi: “kupesa minkayulu ya kimpeve,” bakala nyonso mpe kento yina ke kwiza na Nzambi yina ke kota na vwale.

59 Na Ngwisani ya Ntama, ya vwandaka kaka . . .ya vwandaka na vwale yina vwandaka ya kulelika na kati-kati ya kisika ya santu mpe kisika ya kulutila santu ya santu. Kaka Aaron, yandi mosi, zolaka kota kuna, mbala mosi na mvula. Kasi konso muntu yina kumaka nganga-Nzambi, lendaka vwanda na kutatika, to ntomo ya mana ya ntete yina Moise na Aaron bakaka kilumbu ya ntete mana bandaka na kubwa na zulu. Ntangu bawu sabukaka nzadi ya Jourdain. . .

60 Ba kufwaka bambeni, na manima ya bawu. Mpe kilumbu yina landaka bawu basikaka kuna, mpe bisika nyonso na ntoto, ya vwandaka na mwa baplaketi ya fioti ya kutulula. Nzambi kulumusaka yawu na mazulu. Ba bokilaka yawu “mani,” ba mekaka ntomo mutindu bwiki. Mpe bantu zolaka kaka kulokota

kulutila mingi samu kaka na kilumbu mosi. Kana ba zolaka bumba yawu, ya zolaka kubeba.

<sup>61</sup> Nzambi tubaka na Moise mpe Aaron na kukwenda kuna mpe kulokota ba omer mingi ya kifuluka na yawu, bitunga ya nene, mpe kukotisa yawu na . . . na nzasa, na Kisika ya Santu.

<sup>62</sup> Mpe kuna, ti, konso ntangu na manima ya nsungi yina, ti konso nsungi ke landa yawu, ntangu nyonso yina kinganga-Nzambi ya Levi zolaka luta, mu banza, ti muntu nyonso yina vwandaka ya kulunga na kukuma nganga-nzambi, ntangu ba biekaka yandi nganga-Nzambi, yandi kuzwaka muswa ya kulunga samu na kuzwa yinwa mosi ya mana ya kisina. Beno banza na yawu. Wapi bweso yina bantu banzaka ti bawu zolaka kuzwa, ntangu muntu zabaka ti yandi vwandaka kota na kinganga-nzambi! Yandi vwandaka kwenda samu na kuzwa yinwa mosi yina ba lambaka na kimpeve, yina ba nikaka na kimpeve, madia ya kimpeve yina katukaka na Nzambi na mazulu, yina ba bumbaka na kimpeve.

<sup>63</sup> Ministere ya muvimba kele ya kimpeve. Wapi mutindu bantu lenda tuba ti bawu kele Baklisto, mpe kumanga kimpeve? Mu zaba ve mutindu bawu ke salaka yawu, munu mosi. Beno tala. Kasi, ya kimpeve! Yandi kotaka na kimpeve, kaka na ntangu yandi kumaka nganga-Nzambi.

<sup>64</sup> Wapi mutindu ya kifwanukusu ya kitoko ntangu yayi, ti muntu nyonso . . . Bilumbu yina, ba zolaka butuka na dikanda mosi, Levite, ntete ba kuma nganga-Nzambi, kasi ntangu yayi ya kele “muntu nyonso yina zola, ti yandi kwiza.” Beno me mona? Mpe kaka na ntangu bawu ke kwiza, ata ti, bawu fwana . . . ba ke talaka Mbutukulu na kati ya yawu, mpe. “Beno fwana butuka mbala zole.” Mpe konso bakala to kento yina me butuka mbala zole, ya Mpeve ya Nzambi, kele na muswa samu na (kilumbu yayi), mani. Mani yayi kele Mpeve-Santu.

<sup>65</sup> Ntangu Pierre . . . na manima bawu me basika na poto-poto ya nene, mpe kulemba me kwenda ntama na bawu, mpe Mfumu vwandaka sakumuna bawu, mpe Mpeve-Santu kulumukaka na Kilumbu ya Pentecote. Bawu kwendaka na bala-bala mpe bandaka na kuboka, mpe vwandaka sala mutindu bantu ya kulawuka, na yina ti bantu nyonso banzaka ti ba vwandaka me lawuka malafu. “Beno tuba, mu ke kukiyufula yina beto ke sala samu na yawu?” Konso- . . . Ata mpe yinza ya misambidi, na yina, ba banzaka ti bantu yina vwandaka ya kulawuka malafu.

<sup>66</sup> Mpe beno kuwa, nkundi ya munu ya Katolika, mwense ya kusakumuka Marie vwandaka na bawu. Mpe kana yandi lendaka ve kukuma na Mazulu tii kuna yandi kwendaka kuna mpe kuzwaka ntomo ya Kima mosi yina salaka yandi kusala mutindu kento ya kulawuka malafu, wapi mutindu beno ke kuma kuna kima yankaka kulutila yina? Kasi yandi kuzwaka Kima mosi. “Nkama mosi na makumi zole, na bakento, Marie

Magdala mpe bayankaka,” mpe kwendaka na bala-bala, na kusalaka mutindu bantu ya kulawuka malafu, ke tekita.

<sup>67</sup> Tii ya kieleka (Kana beno lemvokila nzonzola.), dibuundu ya kilumbu yina tubaka, “Beni tala bawu! Ya ke lakisa yina bawu kele. Bawu nyonso kele ya kifuluka na vinu ya malu-malu.”

<sup>68</sup> Ya kele yina Yawu vwandaka. Ntangu yayi beno kuwa, Pierre tubaka (Na yina bawu bandaka na kutuba...), yandi tubaka, “Beni bantu ya Jérusalem, beno yina ke zingaka na Judée, bika ti yayi kuzabana na beno, mpe beno kuwa bandinga ya munu: Bantu yayi me lawuka ve malafu.” Ntangu yayi, mu ke na kuzonzila dibuundu ya Ephèse awa, ntangu yayi. Beni me mona? Beni me mona? Mbote mingi, nsungi ya dibuundu ya ntete. Yandi tubaka, “Bayayi kele ya kukola ve malafu, mutindu beno ke banza. Yayi kele ngunga ya tatu ya kilumbu; banganda kele mpe ve ya kuzibuka. Wapi mutindu...? Mbote, yayi kele ngunga ya tatu ya kilumbu.” Yandi tubaka, “Kasi yayi kele yina profete Joël kuzonzaka. Ya kele ya kusunama na kati ya Biblia ya beno mosi. Na kati ya Biblia ya beno mosi, yayi kele ya kusonika, ti kima yayi ke salama. Na yina,” yandi tubaka, ti, “beno fwana zaba yayi, beno milongi.”

<sup>69</sup> Mbote, ya lendaka vwanda, kaka mutindu—mutindu ba kotisaka dibuundu na yisi ya kumonisama yina, mpe kumonisama mosi yina ba silaka samu na bilumbu ya nsuka, beno lenda ve kuvutuka mpe kutuba, “Yayi kele yina ba zonzilaka?” Beni me mona? Beni bawu yayi. Mpe yinza ya ngaanda zaba kima ve na zulu ya yawu; ya kele—ya kele bulawu samu na bawu. Ntangu yayi bawu tubaka...

<sup>70</sup> Yandi tubaka, “Tala awa.”

Mpe bawu tubaka, “Ntangu yayi...” ntangu bawu kuwaka yayi.

Yandi tubaka na bawu mutindu ti bawu komaka Yesu na kulunsi. Mpe konso ntangu...

<sup>71</sup> Beni lenda kuzwa mulemvo samu na kulunsi Yesu. Beni lenda kuzwa mulemvo samu na kubaka Nkumbu ya Yandi na mpamba. “Kasi nani ke zonga na kuteleminaka Mpeve-Santu, ba ke lemvokila yandi ata mbala mosi ve, na yinza yayi, to na yinza ke kwiza.” Beto kele na bilumbu ya nsuka, na yawu beno sala keba. Beni tambula na kukikulumusa nionso. Beni vwanda na mabanza ya ke nyokwama samu na mulemvo, mpeve ya ke tekita na boma; ntima ya kulemvuka, ya luzolo na kubika Mpeve-Santu kutwadisa beno. Amen. Mbote mingi. Oh, la la!

<sup>72</sup> Bawu yayi, bawu nyonso kele na zulu kuna, kaka bantu ke sala mutindu... Ba vwandaka bantu ya boma, bangunga fyoti na ntuala; ya kukangama na kivinga ya zulu. Kasi ntangu Mpeve-Santu kwizaka na zulu ya bawu mpe fulusaka bantima ya bawu, na babala-bala! Mu banza ve ti bawu vwandaka... Bawu vwandaka sala ve bima yina vwandaka tambula mbote

ve. Bawu vwandaka kuna vwandaka yangalala mpe vwandaka kembila Nzambi, na—na mutindu ti kumonisama vwandaka. Bawu vwandaka kaka ve kuna samu na kuswana mosi na yankaka ntangu yayi, ata ti bawu vwandaka ba-Methodiste to ba-Baptiste, bawu vwandaka, to ata ti bawu vwandaka ba-Pharisien to ba-Sadducéen. Bawu vwandaka kuna vwandaka yangalala samu ti bawu kuzwaka ntomo ya Mazulu na kati ya moyo ya bawu. Nzambi pesaka bawu mana ya kimpeve.

<sup>73</sup> Ntangu yayi, mutindu Nzambi tsyamunaka mani kuna na kimuntu, mpe yawu zingaka ntangu nyonso bawu vwandaka na nzietolo; kifwanukusu ya kitoko. Mpe kilumbu bawu kotaka na yinsi ya nsilulu, mana sukaka.

Mpe na Kilumbu ya Pentecote, kima mutindu mosi . . .

<sup>74</sup> Beno tala Pentecote, na Moise. Ba talaka na manima mpe ba monaka mbeni kufwaka. Miryam bakaka tambourin, yandi bandaka na kubula yawu, mpe yandi bokaka, mpe binaka, mpe kwendaka mbangu na kumu. Bakento landaka yandi, na kusalaka kima mutindu mosi. Mpe Moise telemisaka maboko ya yandi, mpe yimbaka na Kimpeve.

<sup>75</sup> Na Pentecote, bakento basikaka, ke tekita, mpe ke dumuka, mpe ke bina, mpe ke landila. Pierre telamaka na kati-kati ya bawu, mpe tubaka, “Beno bantu ya Judée, mpe beno yina ke zingaka na Jérusalem, ti yayi kuzabana na beno, mpe beno kuwa bandinga ya munu: Samu ti bayayi kele ve ya kukola malafu, mutindu beno ke banza, na kumonaka ya kele ngunga ya yivwa ya suka. Yayi kele yina profete Joël zonzaka; ‘Ya ke salama ti na bilumbu ya nsuka, Nzambi tubaka, Mu ke mwangisa Mpeve ya Munu na zulu ya bantu nionso: bana ya beno ya babakala mpe bana ya beno ya bakento ke pesa profesu: na zulu ya bisadi ya Munu ya bakento mpe bisadi ya babakala Mu ke tsyamuna Mpeve ya Munu; mpe bawu ke pesa profesu: Mpe mu ke lakisa mambu ya ngitukulu na mazulu, mpe na ntoto na yisi; makunzi ya tiya, mpe mupepe, mpe mulinga: Mpe ya ke salama, na ntwala ya kilumbu ya nene mpe ya mpasi ya Mfumu ke kwiza, ti muntu nyonso yina ke bokila Nkumbu ya Mfumu ke kuzwa mpulusu.’” Yandi landilaka mpe landilaka, na kulonga.

<sup>76</sup> Mpe ntangu bawu kuwaka yayi, bawu kuwaka. Bawu tubaka, “Tala muntu yina! Wapi kisika yandi kuzwaka malongi yayi?” Bayankaka na kati ya bawu tubaka, “Yandi lenda sonika ve nkumbu ya yandi mosi.” Biblia ke tuba, “Yandi vwandaka muntu yina zabaka kima ve mpe muntu yina longokaka ve. Wapi lukolo yandi me katuka? Ata mosi ve. Mbote, wapi mutindu yayi me salamaka? Wapi mutindu yayi me salamaka?” Bawu bakulaka, bawu tubaka, “Mbote, tuba, muntu yina kieleka ke na kutangaka Masonuku. Mpe beto me kuwaka Yawu ntete ve.” Beno me mona?

77 Yandi tubaka, “Beno balula ntima, mosi na mosi ya beno, mpe beno botama na Nkumbu ya Yesu Klisto samu na mulemvo ya masumu ya beno, mpe beno ke kuzwa Mpeve-Santu. Samu nsilulu kele samu na beno, bana ya beno, samu na bayina kele ntama, mpe bayina nionso Mfumu Nzambi ya beto ke bokila.” Na nzonzolo yankaka, “Lusakumunu yayi yina me kubwa awa, mutindu yawu salaka mana na manima kuna, ke vwanda samu na nsungi yayi, nsungi yina ke landa, nsungi yina ke landa, na Jeffersonville, na Indiana, mpe na bansuka ya yinza.”

78 Mpe Mpeve-Santu mosi yina kubwaka *kuna*, ke kubwa *ntangu yayi*; mutindu mosi ya bandandu, kima mutindu mosi, bantu mosi. Beno me mona yina mu zola kutuba? Kaka ya kulunga!

79 Beno tala, “Mu ke pesa yandi; yandi yina nungaka, Mu ke pesa yandi Dimpa ya Luzingu.” Yandi tubaka yawu na mosi ya mabuundu. “Mpe yandi ke vwanda diaka ve na mpwila, to yandi ke vwanda diaka ve na nzala. Yandi ke vwanda diaka ve na mpwila.” Kana muntu mbala mosi (Yawu yayi; beno simba kazaka.), kana bakala to kento kuzwa ntete Mpeve-Santu, ata mbala mosi ve ti beno ke lenda dyaka ve na kuningisa yandi. Yandi zaba kisika yandi kele. Beno lenda kwiza na ba-isme mpe nyonso. Yandi ke tambula kaka mbala mosi na kati ya bawu. “Yandi ke vwanda dyaka ve na mpwila.” Yandi zaba kaka kieleka Nani Kiyidiki ya yandi kele; yandi ke vwanda dyaka ve na mubulu. Beno kwamisa yandi ve; yandi ke kwenda kaka na ntwala.

80 “Mu ke pesa yandi Dimpa ya Luzingu, mpe yandi ke vwanda diaka ve na nzala, to yandi ke vwanda diaka ve na mpwila.” Beno me mona? “Mpe Yinti yina kele na kati-kati ya paladiso ya Nzambi, mpe yandi ke kudya, beno me mona, Yinti.” Na yina, Yinti vwandaka Klisto Yesu. Beno me mona? Mpe Klisto Yesu, yina kufwaka mpe vutukaka na mutindu ya Mpeve-Santu, na yawu Yandi kele awa, mpe mani yina ba me kudya na kati ya Dibuundu.

Beno tala, beno tala, ti, nzila ya 6.

*Mpe yandi me sala beto banganga-Nzambi mpe bantinu samu na Nzambi. . .*

81 “Kinganga-Nzambi ya kimpeve; yinsi ya kimfumu; dikabu ya kimpeve.” Yinki ya kele ntangu yayi? “Minkayulu ya kimpeve, ya kele,” ke na kutangaka Masonuku, “ya kele, bambuma ya bikoba ya beto ke pesa lukumu na Nkumbu ya Yandi.” Ntangu yayi, wapi mutindu ya yinki? “Munkayulu ya kimpeve.”

82 Ntangu yayi, ntangu yayi beto lendaka sala mbote na kubanda awa; beno tala, kisika ya mbote na kubanda.

83 Ntangu mwa muvusu ke kota na kati ya dibuundu, beno ke kima mbangu ve na lweka mosi mpe beno ke nionga ntangu yayi. Kana beno kele mutindu yina, beno kele ve nganga-

Nzambi. Beno me mona, beno sambila tii na nsuka. “Munkayulu ya kimpeve, bambuma ya bikoba ya beto ke pesa lukumu na Nkumbu ya Yandi.” Beno me mona yina mu zola kutuba?

<sup>84</sup> “Mbote,” beno ke tuba, “Mu ke kuwaka kaka ve mutindu kukwenda na dibuundu.” Kasi beno kele nganga-Nzambi. Ya kele kisalu ya beno. Beno fwana vwanda kuna.

<sup>85</sup> “Mbote, mu ke na kutala kaka ve mutindu kubaka kitini na lukutakanu.” Beno kele nganga-Nzambi, “ke sala munkayulu, munkayulu ya kimpeve.” Mu ke pesa ve muntu mosi na diboko, mutindu ba ke bokilaka yawu bubu yayi; ya kele nyonso mbote, mu ke telemina yawu ve. Ya ke lomba muntu mosi ve na kukwisa na yinzo-Nzambi; yina ke mbote, mu ke telemina yawu ve. Kasi, ya kele *beno*, *beno* ke na kusala munkayulu ya kimpeve, “bambuma ya bikoba ya *beno* ke pesa lukumu na Nkumbu ya Yandi.”

<sup>86</sup> Ntangu beno ke mona ntangu kukwiza yina muntu nyonso ke vweza mpe ke tuba bima yayi, mpe ke sala bima ya yimbi, yinki nge ke sala, kwenda? Beno fwana telama kuna na munkayulu ya kimpeve, na kutubaka, “‘Menga ya Yesu Klisto ke sukula na disumu nyonso,’ ke sala munu kivangu ya malu-malu na kati ya Klisto Yesu.”

“Nge kele kilawu, mwana ya bakala!”

<sup>87</sup> “Landila yina nge ke tuba. Ya kele nyonso ya kulunga. Kasi, samu na munu, ‘Ya kele ngolo ya Nzambi samu na mpulusu.’ Mu ke kwikila Yawu.” Beno me mona?

<sup>88</sup> Ntangu yayi, bawu ke tuba, “Nge ke kwikilaka na kubeluka ya Kinzambi?”

“Oh, uh, mu zaba ve, nge ke sala mbote na kuyufula pasteur ya beto.”

<sup>89</sup> Yinki *beno* ke banza samu na yawu? Beno kele nganga-Nzambi ntangu yayi. Beno kele muntu. Beno tuba, “Yinga, tata. Mu ke kwikila Yawu, samu ti Ndinga ya Nzambi me tuba ti Yawu kele mutindu yina.”

“Nge ke kwikilaka na mbotika ya Mpeve-Santu?”

“Yinga, tata.”

“Wapi faso?”

“Mu kuzwaka Yawu.” Kieleka mingi. Lusakumunu ya kimpeve! Mpeve-Santu yina kubwaka na zulu ya bantumwa, Mpeve-Santu mosi yina ke kubwaka ntangu yayi.

<sup>90</sup> Beno ke tuba, “Kaka samu na bantumwa.” Beto ke sukisa yawu na mwa ntangu fioti, beno me mona kana ya vwandaka to ve.

<sup>91</sup> Mbote mingi, “Kinganga-Nzambi ya kimpeve, munkayulu ya kimpeve.”

Ntangu yayi, ntangu yayi nzila ya 8, to, nzila ya 7.

*Tala, yandi ke na kukwiza na matuti; . . .*

<sup>92</sup> Ntangu yayi, bika mu telema awa mwa ntangu fioti. “Matuti,” ya zola kutuba ve ti Yandi ke kwisa na nzasi ya nene mutindu Mama, ntima ya yandi kusakumuka, yandi me vwanda awa kisika mosi kuna.

<sup>93</sup> Ntangu mu vwandaka mwana ya bakala ya fioti, yandi vwandaka vwanda mpe tubaka na munu, yandi tubaka, “Yandi ke na kwiza. Dituti ya nene ke telama kilumbu mosi, mpe Nzambi ke kwiza.”

<sup>94</sup> Mpe, ntangu yayi, *dituti* yina Yandi ke na kwiza (Kana beto vwandaka kaka na ntangu ya kuvutula nyonso yayi, mpe kuzwa lufwala ya kieleka ya kima nyonso.), ntangu yayi, *dituti* Yandi ke na kwiza, kele ve dituti mutindu nzasi, kasi, ya kele “dituti ya nkembo,” Yandi ke na kwiza. Beno me mona? Beno me mona?

<sup>95</sup> Ntangu yayi, ntangu Yesu fikakamaka na Nzambi, na zulu ya Mongo ya Nsobolo, “matuti fikaka Yandi na kivudi mpe bilele ya Yandi.” Beno me mona?

<sup>96</sup> Mpe ntangu Elie kulumukaka, dituti kulumukaka mpe yambaka yandi. Ve—ve Dikunzi ya Tiya, ve. . . Mu zola tuba, nzasi ve, kasi, “dituti ya nkembo.”

<sup>97</sup> Mvwandulu ya Yandi ya nene, ya nkembo ke bula ntoto. “Yandi ke kwisa na matuti.” Oh, mu zola yawu. “Matuti,” ya ke vwanda na kitembo na manima ya kitembo, ya nkembo ya Yandi, ke kwisa na zulu ya ntoto, mpe mvumbukulu ya basantu ke kwisa. Ntangu Mpeve-Santu yina ya kusakumuka yina zingaka na kati ya bantima ya bawu, mpe bawu kufwaka, na muludi ya bawu kuna, mpe mulinga na zulu ya matama ya bawu, mpe bima ya mutindu yina, mpe ba me tula yawu awa na maziami. Kitembo ya nene ya Mpeve yina mosi, mpe “wuuuusssh,” kitembo na manima ya kitembo.

<sup>98</sup> “Yandi yina vwandaka ya nsuka ke vwanda ntete, mpe yandi yina vwandaka ntete ke vwanda ya nsuka.” Wapi mutindu ya lendaka vwanda mutindu yina? Yina kele ntumunu ya mvumbukulu. Mu ke zaba muntu mosi ve na nsungi na ntuala ya munu, to nsungi na manima ya munu. Mu ke zaba bayina na kati ya nsungi *yayi*. Mpe bansungi nyonso ke kwisa, na lunungu, kaka mutindu bawu kulumukaka. “Bawu yina vwandaka ya nsuka ke vwanda ntete.” Kieleka, ya fwana vwanda. Beno me mona? Mu ke zaba bantu ya munu. Muntu yina ke landa, papa ya munu, ke zaba bantu ya yandi; nkooko ya yandi ya bakala, bantu ya yandi; kulandila mutindu yina.

<sup>99</sup> Kitembo na manima ya kitembo, na manima ya kitembo, na manima ya kitembo, mpe basantu ke basika bisika nionso. Ya ke vwanda mbote ve? Amen. Yina ke sala ti biboba kuvwanda diaka ntwenya. Yinga. Ntangu yayi beno tala mbote. Mbote mingi.

. . . ke kwiza na—na *matuti*; *mpe disu nyonso ke mona yandi*, (Ata ti ntama bawu kufwaka, bawu ke mona dyaka Yandi.) *mpe bawu mpe bayina tobolaka yandi: mpe makanda nyonso ya ntoto ke vwanda na mafwa samu na yandi. Mpe na yawu, Amen.*

<sup>100</sup> Jean zolaka boka kaka, “Amen.” Ya keke, “Na yawu vwanda mutindu yina. Ti ya vwanda mutindu yina.”

*Mu keke Alpha mpe Omega, . . .*

<sup>101</sup> Ntangu yayi, *Alpha* keke “A” na alphabet ya Greki. *Omega* keke “Z” na kati ya alphabet ya Greki. Ntangu yayi, na nzonzolo yankaka, kana ba bangulaka yawu bubu yayi, “Mu keke A tii Z.” Ntangu yayi, nani yankaka keke kuna? “Mu keke ya Ntete; Mu keke ya Nsuka. Mu me katuka A tii Z.”

<sup>102</sup> Kana beto vwandaka na ntangu ya kukota na Bunzambi ya Klisto, kaka na ntangu yayi, yina zolaka vwanda kieleka ya kulunga na ntangu yayi, Bunzambi.

<sup>103</sup> Na yawu, bilumbu ntangu bantu mingi ke meka na kusala Yandi kaka mulongisi, kaka philosophe, to kaka profete. Yandi vwandaka Nzambi. Yandi vwandaka to Nzambi to muntu ya luvunu ya kulutula nene yina yinza me kuzwaka ntete ve. Kana Yandi vwandaka profete, menga ya yandi vwandaka muntu. Kana Yandi vwandaka mulongisi, mulongisi, menga ya yandi vwandaka muntu.

<sup>104</sup> Yandi vwandaka Nzambi, mpe Menga ya Yandi vwandaka Nzambi. Nzambi ya Ngolo nyonso fikaka mwense Marie mpe vangaka cellule ya Menga na kati ya kivumu ya yandi yina basisaka Mwana, Klisto Yesu. Mpe Nzambi kulumukaka mpe zingaka na kati ya nzutu yina, Nzambi (Emmanuel), kumaka nsuni na kati-kati ya beto; katula masumu.

<sup>105</sup> Ntangu Nzambi salaka muntu ya Yandi ya ntete, Yandi salaka yandi na kifwani ya Yandi Mosi, yina vwandaka mpeve ya muntu, na Genèse 1:26. Mbote mingi. Na yina ya vwandaka ve na muntu samu na kubundula ntoto, na manima Yandi salaka bakala, bakala mpe kento. Beto ke kota na yawu, na manima ya mwa ntangu fyoti, na zulu ya “bambwetete sambwadi yina.” Kasi kaka . . . Kasi Yandi salaka yandi nyonso zole bakala mpe kento, na manima kuna na mbandukulu, ya keke kieleka, “na kizizi ya Yandi Mosi.” Mpe Nzambi keke Mpeve.

<sup>106</sup> Mpe na yina, Genèse 2, ya vwandaka ve na muntu samu na kubundula ntoto, na yawu Nzambi tulaka yandi na kati ya nzutu; salaka muntu, ve na kifwani ya Yandi, kasi na fundu-fundu ya ntoto (Ya keke kieleka.), pesa yandi diboko mutindu dikaku, mpe dikulu mutindu ulusu, to nyonso yina; mu zaba ve, kasi Yandi pesaka yandi ba-sense tanu ya kukutana na yinzo ya yandi ya ntoto. Mpe na yina muntu yina sumukaka.



107 Mpe Nzambi kulumukaka mpe kumaka muntu, samu na kukatula disumu ya muntu (Amen.), mpulusu.

*Mu kele Alpha mpe Omega, . . .*

108 Mu talaka Yandi awa na Apocalypse kapu ya 4. Ntangu Jean balukaka samu na kumona Ndinga yayi diaka, yina vwandaka tuba na yandi, “Yandi vwandaka ya kuvwanda na zulu ya Kiti ya kimfumu, mpe mukyama vwandaka na zulu ya yintu ya Yandi.” Mpe mukyama kele na bantinta sambwadi ya kulunga, mpe bantinta sambwadi yayi ya kulunga vwandaka monikisa Bansungi Sambwadi ya Dibuundu. Ya kele kieleka, dyaka. Mpe yinki ya vwandaka? Yawu yayi. Mpangi, yayi kele ya malu-malu. Beno tala, bantinta sambwadi ya kulunga, sambwadi, mpe mukyama ke monikisa ngwisani.

109 Nzambi pesaka Noé mukyama, ntete, mutindu ngwisani. Mpe bima yango kele dyaka na ntoto, mutindu Nzambi silaka na ntwala, mpe ntangu yawu ke nokaka, mpe Yandi ke mona mukyama. Yandi tubaka, “Mu ke bebisa yawu ata fioti ve na masa.”

110 Mpe na yina yandi talaka na zulu ya Yesu, vwandaka na bantinta sambwadi na zulu ya Yandi; Yandi vwandaka na kati ya yayi, yina vwandaka ngwisani ya Nzambi. Mpe Yandi vwandaka ya kutelama na kati-kati, Minda Sambwadi ya Wolo. “Mpe Yandi vwandaka talana mutindu ditadi ya jaspe mpe ya sardoine.” Jaspe vwandaka Ruben, mpe sardoine vwandaka Benjamin; ya vwandaka ya ntete mpe ya nsuka ya bankooko. Ti “Alpha mpe Omega, Mbandukulu mpe Nsuka,” mpe bantinta sambwadi ya mukyama, Bansungi Sambwadi ya Dibuundu, ngwisani na Yandi, na Minda Sambwadi ya Wolo, na bambwetete sambwadi. Oh, wapi kizizi, kana beto kuma na yawu na manima ya mwa ntangu fyoti, mu banza, kana Mfumu zola. Mbote mingi.

*. . . Alpha mpe Omega, mbandukulu mpe nsuka, me tuba Mfumu, yina kele, . . . yina vwandaka, mpe yina ke kwiza, ya Ngolo nyonso.*

111 Ooh! Nani Yandi kele? Yayi kele luzayikisu ya nani? Yesu Klisto. Mpe, awa, Yandi kele ve profete. Awa, Yandi kele ya Ngolo nyonso, Nzambi yina me monisama; Alpha, Omega. “Mu kele ya A tii Z. Mu kele Yandi Yina Vwandaka, Yina Kele, mpe Ke Kwiza. Mu kele ya Ngolo nyonso.” Ya kele pwelele, mutindu yina ve? Ata siansi ya ntembe ve kuna. “Mfumu, Yina Vwandaka, Yina Kele, mpe Ke Kwiza, ya Ngolo nyonso.”

112 Ntangu yayi Jean ke na kuzonzaka. Beno kuwa.

*Munu Jean, yina mpe kele mpangi ya beno ya bakala, mpe yina ke kabula mpasi na kati ya lukwamusu, mpe na kati ya kimfumu mvibudulu ya Yesu Klisto, vwandaka na kisanga yina ba ke bokilaka Patmos, samu na ndinga ya Nzambi, . . .*

113 Beno ke tuba, beno lenda banza ti ba me tula muntu na kisika mutindu yina, samu na Ndinga ya Nzambi? Yinga.

*. . . samu na ndinga ya Nzambi, mpe . . . kimbangi ya Yesu Klisto.*

114 Ba nataka yandi kuna samu na kulonga Ndinga na bantu ya nsambulu. Yawu yina Ndinga me tuba. Mutindu yina ve? Yandi vwandaka kuna samu na kulonga; ba basisaka yandi, na ngaanda ya dibuundu, na kati ya kimvuka, na yinza ya muvimba. Amen. Kasi ba basisaka yandi ve na Yandi Yina zolaka yandi mpe sukulaka yandi na Menga ya Yandi Mosi. Yandi vwandaka na Mvwandulu ya Yandi, na kisanga yina ba bokilaka Patmos, “samu na Ndinga ya Nzambi.”

115 Mu ke kukiyufula milongi yikwa bubu yayi ke kwenda? Ba ke kulumuka tii ba ke kwenda kusala mwa kima ya fioti—mwa kima ya fioti, ba ke dasuka, ya ke yangisaka beto mingi. Mpe awa ba tulaka bakala yayi na mafuta ya kutokisa bangunga makumi zole na yiya, mpe ba losaka yandi na kisanga ya Patmos, mpe Mfumu vwandaka dyaka na yandi.

116 Mu ke zolaka kaka nkunga yina ya ntama yina bawu vwanda yimbaka, “Kana Yesu kwenda na munu, mu ke kwenda kisika mosi.” Beto ke yimba yawu, kasi mu ke kukiyufula kana beto zola kieleka kutuba yawu. Na dibanza ya munu ya kieleka, ya ke vwanda ntangu mingi ve tii kuna ba ke pesa beno siansi ya kusiamisa yawu, na yina beto fwana vwanda kulutila mbote ya kundimama. Beno fyongonina, beno tala mbote, beno tala kana bima nyonso kele kaka ya kusungama.

117 Ntangu yayi, kaka mutindu, ya zolaka banda kaka awa ntangu yayi. Jean pesaka mvutu, mpe yandi tubaka ti yandi vwandaka “na kisanga ya Patmos, samu na Ndinga ya Nzambi, mpe kimbangi.”

*Mu vwandaka na kati ya Kimpeve . . . (Mu zola yawu.)*

*Mu vwandaka na kati ya Kimpeve na kilumbu ya Mfumu, . . .*

118 Na kuzonzilaka kilumbu yankaka, ntangu yayi; na bankundi ya munu ya ba-Adventiste, yina kieleka beto ke kota na yawu, na manima ya mwa ntangu fyoti. Mbote mingi.

*. . . na kati ya Kimpeve na kilumbu ya Mfumu, kotaka na Kimpeve, mpe mu kuwaka na manima ya munu ndinga ya nene, . . . ya mpungi,*

119 Beto bika ve bidimbu yayi ntangu yayi. Beto ke na kutula na lufulu ntangu yayi, na yawu beto zaba yina beto ke na kuzonzila ntangu mu ke kuma awa. Beno me mona yina beto ke zonzila, “Nani Yawu kele? Yinki kele Muntu yayi? Yinki kele Luzayikisu ya Yesu Klisto? Nani Yandi kele, na mutindu nyonso? Wapi mutindu Yawu kwizaka? Yinki Yawu zola kutuba na munu?” Beno me mona kana Yawu zola kutuba kima mosi samu na beno,

beno me mona. “Beno me mona yina ya ke salama kuna, samu na munu.” Beno tala.

*mu vwandaka na kati ya Kimpeve . . .*

<sup>120</sup> Ata mutindu santu beno kele, ata mutindu santu beno kele, ata lutangu ya mulongi to mambele, ata nyonso yina beno kele, beno ke vwanda ata fioti ve na kiyeka ya kukuma kisika mosi na Nzambi tii kuna beno ke kota na Kimpeve. Ya kieleka. Mu zola ve kukota na emotion. Mu zola kutuba kukota na Kimpeve. Beno me mona? Beno me mona? Beno me mona, beno ke kota na emotion, beno sala nyonso. Kasi ntangu beno ke kota na Kimpeve, beno ke mona bima. Ya kele kieleka.

<sup>121</sup> Mu lenda banza kiboba Elie, profete ya kiboba, kuna kilumbu yina ntangu—ntangu. . . ntangu mwana ya Achab, bawu, salaka ngwisani na bantu ya kukondwa lukwikilu, mpe—mpe Josaphat vukanaka na bawu. Mpe bawu kwendaka na ntoto ya kuyuma bilumbu sambwadi, mpe bawu nataka ve boussole. Samu ti kaka bilumbu sambwadi, mingi samu na kukeba bawu bilumbu sambwadi; yufulaka ve Mfumu; landilaka kaka, na mutindu nyonso.

<sup>122</sup> Ya kele kaka ve mutindu bantu? “Oh, mu ke tuba na nge, ya kele kisalu ya kulutula mbote. Mu ke bika kaka dibuundu *yayi* mpe mu ke kwenda *kuna*.” Ntangu yayi, beno fwana yufula Mfumu samu na yawu, beno tala yina yawu kele.

<sup>123</sup> Bawu kwendaka kuna mpe monaka ti bawu kotaka na mpasi. Ba katulaka masa. Yawu yina diambu na mabuundu bubu yayi, beno ke kwenda pene-pene kuna samu na kusala bima mingi ti beno ke yufula ve Mfumu samu na yawu, mpe yinto ya beno ke kangama. Beno ke kukiyufula samu na yinki beno kele ve na balusakumunu yina beno me kuzwa, mpe ngolo ya Nzambi ke sala na kati-kati ya beno, mu banza ba me zenga nzila. Beno zaba, ntangu beno ke basika, maza . . .

<sup>124</sup> Mu ke kota na ntoto ya kuyuma ntangu yankaka, kuna na Arizona. Mpe mu me bakula ti matiti nyonso na kati ya ntoto ya kuyuma ke tsokotaka; ya ke tsokota beno. Konso ntangu beno ke telemina yawu, ya ke tsokota beno. Samu ti ya ke vwandaka ve na masa mingi samu na kukeba yawu, manama ke basikaka samu na kunwana.

<sup>125</sup> Beno ke vutuka na zulu awa, to na zulu kuna na kati ya Oregon to kisika mosi kuna kisika ya ke nokaka ntangu nyonso, mpe mosi na mosi ya bawu mutindu mosi ya matiti kele ve na nkawa na zulu ya bawu. Beno me mona, maza ke kangaka bawu pete-pete.

<sup>126</sup> Mpe yawu yina diambu na dibuundu. Ntangu beno nyonso kele ya kuyuma mpe ya kukangama, mpe nyonso, beno ke kuma madidi mingi mpe ya misiku mpe ya kuswaswana, beno ke kuzwa ve lusakumunu ya kimpeve, na yina ntima ya beno ke fuluka mpe ya kufuluka na kyadi mpe nganzi, mpe, muntu nyonso, “Oh, mu

ke kwenda mpe na yandi. Mu ke kwenda mpe na yandi. Mu ke bika dibuundu.” Kaka nkonga ya manama yina ke zinga na ntoto ya kuyuma. Ya kieleka. Yina beno ke na yawu nsatu kele mwa Masa ya mbote ya Mpeve-Santu ya mutindu ya ntama kunoka na zulu ya beno, mbala mingi na zulu ya ntima yina ya ntama ya ngolo. Amen.

<sup>127</sup> Mu ke—mu ke meka ve na kusakana. Mu ke na kumeka na kunata yayi na beno. Mpangi, beno ke mona ti, kana beno baka kidimbu ya kibulu, kisika beno ke vwanda ya kutelama. Mpe beno kele kieleka ya kukondwa lusalusu mpe ya kukondwa kivuvu ntangu beno ke sala yawu. Ya kele ve na mulemvo samu na yawu. Beno lenda basika na yawu ata fioti ve. Ya kele kieleka. Beno lenda sala yawu na nzila ya nsinga ya disu ya beno, na kutala, beno me mona, na yina beno sala keba. Ntangu yayi yawu yayi. Ke pesa yandi. . . Beno tala, ntoto ya kuyuma. . .

<sup>128</sup> Mu tubaka, bamaza, mutindu ti bamaza vwandaka zitisa yawu na pete-pete. Ya kele yina beto ke salaka bubu yayi, na kukotaka na kati ya Kimpeve. Jean tubaka, “Mu vwandaka na kati ya Kimpeve.”

<sup>129</sup> Ntangu Elie kuna na ntoto ya kuyuma, bawu kulumukaka. Josaphat tubaka, “Beto kwenda kuna mpe beto yufula profete.” Bawu kwendaka na ntwala ya profete.

<sup>130</sup> Mbote, ntangu yayi, yandi me telemisa kyadi ya yandi ya ludedomo. Yandi talaka na muntu yango, mpe yandi tubaka, “Samu na yinki nge ke kwenda ve na nzambi ya mama ya nge? Samu na yinki nge ke vutuka ve na dibuundu ya nge mosi, ya ntama, ya madidi, ya misiku? Samu na yinki nge kwizaka na munu, ntangu nge kotaka na mpasi?” Yina vwandaka ve kima ya mbote mingi na kutuba, kasi yina kele kaka mpova ya kulutula mbote samu na kutuba yawu. “Samu na yinki nge me kwisa na munu? Samu na yinki nge ke kwenda ve na nzambi ya mama ya nge? Beno nyonso kele na mabuundu yango ya nene ya mbote, mpe banganga-Nzambi yango nyonso ya mbote, mpe nyonso yina, kuna. Vutuka mpe yufula bawu samu na yawu. Samu na yinki nge ke kwisa awa na munu?” Fiu. Oh. Yandi kele mutindu ya kuvimba, kieleka, mutindu yina ve? Yandi tubaka, “Ya vwandaka ve ti mu zitisaka mvwandulu ya muntu yina ya santu, Josaphat, mu zolaka tala nge ve.” Oh, la la, wapi mutindu profete yina kotaka. Ntangu yayi yandi kele nyonso na mutindu yina.

<sup>131</sup> Yandi tubaka, “Mbote, natila munu nsambi.” Bantu yankaka ke kwikilaka ve na miziki na kati ya dibuundu. Kasi yandi tubaka, “Natila munu nsambi.” Mpe ntangu nsambi ke banda na kubula mwa nkunga ya mbote ya ntama, *Pene-pene, Nzambi ya Munu, Na Nge*; nionso yina nge zola bokila yawu, mu zaba ve. Ntangu nsambi ke banda na kusambila, Mpeve ya Nzambi ke

kwisa na zulu ya profete. Mpe ntangu Mpeve kumaka na zulu ya yandi, yandi kotaka na vision; yandi bandaka na kumona bima.

<sup>132</sup> Beno fwana kuzwa Mpeve ya Nzambi. To, beno ke tuba, “Mu lenda ve kubakula mutindu bantu lenda tuba, ‘Amen.’” Kota mbala mosi na kati ya Kimpeve. Ya kele kieleka.

<sup>133</sup> Mu lenda mona ve mutindu bawu ke telemaka na nsaka ya baseball mpe ke bula mosi na yankaka na manima, mpe ke boka mpe ke dila, mpe ke benda yimpu mpe ke landila. Ya ke monana mutindu bulawu, samu na munu. “Mbote,” beno ke tuba, “nge kele ve fane ya mbote ya base-ball.” Mu kele kaka pene ya mingi. . .

<sup>134</sup> Wapi mutindu samu na beno, mutindu Muklisto? Mbote mingi. Ya kele kieleka. Beno fwana kota na Mpeve ya yawu.

<sup>135</sup> Ya kele mutindu ya kele ntangu beno vwanda kwendaka na kubina. Mu banza ve ti beno ke kwenda ntangu yayi. Kieleka ve. Kasi kana beno—beno vwandaka na kikalulu ya kukwenda, ba zolaka bula miziki ya hoop-up, mpe ba ke bula ba-bandi mpe ba ke bula ba-drum, mpe kusala konso kima yina vwandaka samu na yawu; mpe bakento kwendaka mbangu kuna, ndambu kinkonga mpe nyonso yankaka, mpe ba ke bina na nsi kuna, mpe nyonso; ba ke kota na mpeve ya makinu. Mbote, ya kele kieleka, beno ke kota na kati ya kimpeve ya yawu. Ya kele mpeve ya dyabulu. [Dibuundu me tuba, “Amen.”—Mu.] Kyese ti nge tubaka, “Amen,” samu ti ya kele kieleka. Mu ke lakisa yawu na nzila ya Biblia. Ya kele kieleka. Mbote mingi.

<sup>136</sup> Beno tuba, “Mbote, mu ke kwikila yawu ve, mpangi ya bakala.” Mbote, beno, ya kele ve yina beno ke tuba, to yina mu banza.

<sup>137</sup> Ya kele yina Ndinga ya Nzambi ke tuba. Ya kele yina ke sukisa dyambu. Ya kele Ndinga ya nsuka. Yinga, tata. Yandi tubaka, “Kana beno zola yinza, to bima ya yinza, luzolo ya Nzambi kele ve na kati ya beno.” Ya kele kieleka. Mpe beno ke bambuka moyo na mwa kento yina, ya kiboba longaka mwana ya yandi ya kento na kubina, mpe bima ya mutindu yina, mpe kwendaka kuna mpe binaka na ntuala ya ntinu, mpe lombaka yintu ya Jean Mubotiki; makumi sambwadi ya bana ya yandi kufwaka mutindu bandumba mpe ba-litre zole. Beno lenda mona yina yawu ke sala mutindu yina.

<sup>138</sup> Mama ya Moise vwandaka na yinzo, mpe bumbaka yandi, mpe longaka yandi Ndinga ya Mfumu, beno me mona yina salamaka na yandi mpe ya yandi. Na nzila ya yandi basikaka. . . Abraham, mpe nyonso yankaka, mpe kulandila.

<sup>139</sup> Mbote mingi, ya ke tala kaka na yina beno zola kusala. Beno, beno kele na kimpwanza. Beno ke sala na yina nyonso beno zola kusala. Kieleka. Nzambi me tula na ntuala ya muntu, mutindu disamba ya Eden, Yinti ya Luzingu to yinti ya lufwa. Beno ke sala nsodolo ya beno. Beno me mona? Ata nyonso yina moyo ya

beno kele na yawu, ya kele yina beno ke kudya. Beno tala ntangu yayi. Mpe bawu vwandaka. . .

140 Mu zola kutanga dyaka yayi ntangu yayi. Yandi vwandaka na kati ya Kimpeve. Mpeve kwizaka na zulu ya yandi. Yandi bandaka na kumona bima. Ntangu yayi beno tala mbote.

*Mu vwandaka na kati ya Kimpeve na kilumbu ya Mfumu, mpe mu kuwaka. . .*

*Mu kotaka na Kimpeve na kilumbu ya Mfumu, mpe mu kuwaka na manima ya munu ndinga ya nene, . . . ya mpungi, . . .*

141 “Mpungi.” *Mpungi* kele “luzabusu.” Gabriel, na Nkwizulu ya Mfumu, ke wakana makelele ya Nzambi. Yayi vwandaka mpungi ya Nzambi yina vwandaka bula. Na nzonzolo yankaka, Yandi ke na kukubamaka na kusamuna kisika ya nsuka ya Seko ya yinza. Mpungi, yinki ya kele? “Beno kubama. Mu ke pesa beno Luzayikisu ya Yesu Klisto, samu na kupesa na Dibuundu. Mu ke zonza na beno, yinki ke vwanda nsuka ya yinza, samu na bayina ke kuzwa mpe bayina ke manga.”

142 Mpungi ya Nzambi. “Beno sala keba!” Konso muntu, ntangu mpungi ke bula, yandi ke kanga mbele ya yandi mpe ke telama na kisika mosi, beno kuwa mbote. Mpungi!

143 Paul tubaka, “Kana mpungi kupesa muningu ya mbote ve, nani ke kubama samu na mvita?”

144 Ya kele mutindu ya kele bubu yayi. Oh, mpangi, ntangu mu ke tala bisika nyonso mpe ke mona mabuundu nyonso yayi ya madidi, ya misiku, ya kuswaswana, mpe bima mutindu yina, “ke lakisa mutindu ya kinzambi, mpe ke manga ngolo ya yawu,” wapi mutindu muntu lenda kubama yandi mosi? Yandi ke pesa muningu ya mbote ve.

145 Beno tuba, “Mbote, ntangu yayi, mu ke kota na mabuundu. Mu ke kwenda kuna mpe ke meka ba-Methodiste, to ba-Baptiste, to ba-Luthérien, to ba-Pentecotiste. Mu ke sala kima mosi. Mu ke sala mutindu mosi ya kutambula.” Oh, ya kele yawu ve.

146 “Kaka kana ti muntu kubutuka dyaka.” Mu ke kipe ve kana yandi kele Methodiste, Baptiste, Pentecotiste, to nyonso yina yandi kele, beno fwana butuka mbala zole; beno ke kota ve na Kimfumu. Amen.

147 Tala,

*. . . ndinga, . . . ya mpungi,*

*Na kutubaka na munu, mu kele Alpha mpe Omega, . . .*

148 Kima ya ntete. . . Yandi ke kotisa awa, “Mu kele, ya Ntete mpe ya Nsuka.” Kima ya ntete, ntangu mpungi ya Nzambi wakanaka, yandi balukaka. Mpe Yandi tubaka, “Mu kele Alpha mpe Omega. Mu kele ya A tii Z. Mu kele nyonso ya yawu ntangu

yayi. Beno telama mpe beno kuwa Munu, mwa ntangu fyoti.” Mbote mingi.

*...ya ntete mpe ya nsuka: ...Yina nge ke mona, sonika yawu na kati ya buku, (ya kele Buku yayi beto ke na kutangaka) mpe fidisa yawu na . . .*

<sup>149</sup> Wapi kisika? Ya kutuba kieleka. Wapi kisika samu, kuvutuka na nsungi? Ve. “Na dibuundu.” Na dibuundu. Beno tala.

*... Yina nge ke mona, sonika yawu na kati ya buku, mpe fidisa yawu na mabuundu sambwadi yina kele na Asie; . . .*

<sup>150</sup> Na yina, ya vwandaka kifwani ya dibuundu. Ntangu yayi, beto ke kota na yawu, na baminuti fyoti, na kulakisaka mutindu Ngwisani ya Ntama vwandaka fwanikisa na bansungi sambwadi. Bansungi sambwadi vwandaka, to mabuundu sambwadi vwandaka awa na Asie, yina Biblia me longa pwelele, yina vwandaka kivudi, to kifwani ya Bansungi Sambwadi ya Dibuundu yina vwandaka kwiza. Mpe na nzila ya lusalusu ya Nzambi, mpe na Biblia, lenda siamisa ti konso nsungi ya dibuundu me salama kaka kieleka kisika Yawu tubaka ti ya ke vwanda, kaka kieleka kisika Biblia ke tuba ti ya ke vwanda. Mpe beto me kuma na nsuka ya nsungi ya dibuundu ya nsuka.

<sup>151</sup> Mpe kuvutuka na Ngwisani ya Ntama, kubaka ndosi ya Daniel, mpe talisaka yandi vision ya kimfumu ya Bantu ya makanda, wapi mutindu ti yandi monaka kizizi ya kutelama; na yintu ya wolo, ntulu ya kisengo, mpe mipende ya airain, mpe bitambi mpe makulu ya kisengo mpe ntoto. Mpe lakisaka mutindu mosi na mosi ya bimfumu yango me nunga mosi na yankaka, kaka kieleka mutindu Biblia ke tuba. Mpe, beno tala, yintu ya wolo, Babylone; ba-Medes na ba-Perse, ba-Grec; mpe kimfumu ya Rome; mpe kimfumu ya Rome bukaka na bimfumu kumi, na esete mpe Rome ya wesete, mpe nionso yina. Mpe na kati kuna, ya vwandaka na kisengo mpe ntoto, mpe bawu zolaka vukana ve kintwadi; Protestant mpe Katolisisme na yisi ya luyalu mosi ya Bantu ya makanda. Mpe yandi tubaka ti ata mpe kumeka na kubuka ngolo mosi na yankaka, ba ke kwelana na mosi na yankaka, kaka kieleka yina bawu ke na kusalaka bubu yayi, kieleka.

<sup>152</sup> Mpe kimfumu yina na bilumbu ya bantinu yina. Nzambi ya Mazulu basisaka Ditadi na mongo, kukondwa maboko, yina bulaka kifwanisu yayi na makulu mpe bukaka bimfumu nionso ya Bantu ya makanda. Mpe Kimfumu ya Klisto twadisaka mpe yalaka, mpe kulaka, mpe fikaka ntoto mpe mubu mpe zulu. Bimfumu ya Bantu ya makanda bebaka mutindu mpusu na kyonzika na bantangu ya été. Wapi kizizi yina beto ke na kuzingila. Ya kele kieleka.

<sup>153</sup> Mpe bubu yayi, beno ke mona Katolika mpe ba-Protestant ke kwelana na mosi na yankaka, ke meka na kubuka ngolo; beno

telemisa bana ya beno, beno fwana sila bawu mutindu *yayi* to mutindu *yina*. Beto ke kota na yawu, na manima ya mwa ntangu fyoti, na mwa bankokila. Beno tala yawu, mutindu ya kele, mpe mutindu (yankaka) ngolo ya kisengo yalaka na zulu ya yankaka, bukaka yawu na bitini mpe mwangisaka yawu.

154 Kasi Mwana-dimeme kwisaka mpe telemaka. Mpe bantu ya santu na kilumbu yina . . .

155 Mpe wapi mutindu ti ngolo ya Rome tambulaka na bayinsi nyonso. Ya kele ve na ngolo yankaka na yinza, mpe kaka mutindu mosi ya lendaka luta, ya kele na nzila ya Katolika, dibuundu ya Katolika, na yinza ya muvimba, ke kabwana na kati kuna. Ya kele kifwani ya kitoko, ya nene awa.

156 Ntangu yayi, samu na beno ba-Protestant, beno landila kaka basapatu ya beno, samu ti, mpangi, beno kele kaka na yawu. Mpe mu lenda siamisa yawu na nzila ya Ndinga ya Nzambi, beno kele kaka na kati ya yawu mutindu—mutindu bayankaka ya bawu.

157 Ntangu yayi, beno tala mbote ntangu yayi, “Ya Ntete mpe ya Nsuka. Yina beno ke mona, sonika na kati ya Buku.” Ntangu yayi, Yandi tubaka na yandi:

. . .sonika yayi na kati ya buku, mpe fidisa yawu na . . .  
*mabuundu yina kele na—na Asie; na Ephèse, mpe na Sardes, mpe . . .Pergame, . . .mpe nyonso yankaka, mpe Philadelphie, mpe . . .Laodicée.*

158 Ntangu yayi beto ke telama kuna, kaka mwa ntangu fyoti to zole, beno me mona kaka bambala yikwa mu me kuzwa, samu ti mu zola kubaka dibanza yayi ya nsuka awa, na Ephèse, mpe mu ke nata yawu tii na Laodicée, mpe kumona kana ba me bumba beto ve na dibuundu mosi, beno me mona, beno mona kana beto ke zinga ve na kilumbu yayi.

159 Oh, Dibundu ya Nzambi ya moyo, ke telama mpe ke sema. Beno tala. Beno ke bakula ve. Mu ke zola ti mu vwanda na mwa shoke yina mu lendaka pesa beno, na mutindu mosi. Mu ke zola Mpeve-Santu kukwisa na ngolo ya Yandi ya nene mpe ke nata beno na kisika yina beno ke baka Biblia yayi mpe ke tuba, “Bika mu tala na *Yayi*,” ntangu beno ke mona:

Bayinsi ke na kupanzana, Israel ke na kuvumbuka,  
 Bidimbu yina Biblia zabisaka na ntwala;  
 Ba me tanga bilumbu ya Bantu ya makanda, ba me fuluka na boma;  
 “Vutuka, O nge yina me zimbana, na yina ya nge.” (Ya kieleka.)

Kilumbu ya mpulusu me belama,  
 Bantima ya bantu ke na kubwa na boma;



Beno vwanda ya kufuluka na Mpeve ya Nzambi, minda ya beno ya kuyilama mpe ke sema,  
Beno tala na zulu! Mpulusu ya beno me belama.

<sup>160</sup> Ya kele kieleka. Oh, wapi kilumbu. “Sonika yawu, fidisa yawu na mabuundu.”

<sup>161</sup> Ntangu yayi, kaka mutindu Israël kwizaka na kitoko ya yawu, kuna na mbandukulu na yisi ya Abraham, kwizaka na nzila ya bankooko. Mpe na kilumbu ya Achab ya kotaka na bansungi ya mudidi, nsungi ya mudidi mingi yina dibuundu monaka. Mu basikaka kuna. . . Mpe na ntangu yina, mutindu ti Achab kwelaka Jézabel, nataka kusambila biteki na dibuundu ya ba-orthodoxe.

<sup>162</sup> Kima mutindu mosi, yina, ba-Protestant me kwelana na ba-Romain na bamvula funda mosi na bankama tanu ya bansungi ya mudidi, na Dibuundu ya Pergame, mpe kubasika na kusambila biteki, na yisi ya mutindu ya Buklisto, na kukwendaka na nsungi ya tiya ve madidi ve yina ke na kwiza na ntwala ya beto. Mpe beto kele na kati ya yawu malu-malu yayi. Beto kele na nsungi ya tiya ve madidi ve.

<sup>163</sup> Beno ke kwikila yawu ve? Ntangu yayi mu ke vwanda na. . . beno bantu yina kele na ngaanda na mabuundu yankaka. Beno kele na nsungi ya tiya ve madidi ve. Mpe ba-evangeliste ya beno ke na kusabuka ntoto, pene-pene ya ntoto, kulonga bima mutindu yina; beno ke na kukuma kisika mosi ve. Beno ke na kuboka. . . Beno ba-Baptiste ke na kuboka, “Mafuku ya kulutula na mvula 44.” Yinki beno kele na yawu ntangu beno kele na yawu? Ya kele kaka na nkonga ya misumuki yina me kwiza, na bankumbu ya bawu na buku (Ya kele kieleka.), tuba bawu kele mambele ya dibuundu ya ba-Baptiste. Yina kaka ve, kasi yankaka, ba-Methodiste, ba-Campbellite, mpe kimvuka ya muvimba, kaka ya misiku mpe tiya ve madidi ve. Billy Graham vwandaka na yawu, “Mafunda makumi tatu ya bandimi,” yandi tubaka, “na basabala sambanu. . .” Mpe basabala sambanu na ntwala yandi lendaka ve kuzwa makumi tatu. Samu na yinki? Samu na yinki? Ba ke na kima mosi ve, na kubanda. Kaka nkonga ya misumuki, ntangu ba tulaka nkumbu ya bawu na buku, na yisi ya ntangu ya reveil.

<sup>164</sup> Yandi tubaka, “Kimfumu ya Mazulu kele mutindu muntu mosi me losa filet, mubu. Ntangu yandi basisaka, yandi vwandaka na bima nyonso.” Yandi kuzwaka bakafulu. Yandi kuzwaka bankala. Yandi kuzwaka bakafulu ya masa. Yandi kuzwaka mayuyu. Yandi kuzwaka bankala ya masa. Yandi kuzwaka banyoka. Ya kele kieleka. Kasi na kati kuna, yandi vwandaka na mwa mbisi, mpe.

<sup>165</sup> Mpe ntangu muntu ke longaka reveil na yisi ya ngolo mpe kumonisama ya Mpeve-Santu, filet me bendana na bantu. Ya kele kieleka. Kasi kana yandi kele nkala na kubanda, yandi kele nkala na nsuka ya reveil.

<sup>166</sup> Kana yandi kele katulu ya masa, kima ya ntete beno zaba, yandi ke banda na kutala na ziunga, na kutubaka, “Mu ke kwikilaka ve na bima yayi ya ntama na mutindu nyonso,” mpe plop kuvutuka na maza.

<sup>167</sup> Kana yandi kele nyoka, yandi ke tuba, “Mu tubaka na nge samu na yawu,” mpe yandi ke kwenda. Yandi vwandaka nyoka na kubanda, nkadulu ya yandi vwandaka. Mpe yandi ke vwanda ata mbala mosi ve kima yankaka tii yinza yango ke soba.

<sup>168</sup> Muntu lenda kota na dibuundu ve, to kuzwa kuningana ya nzutu, to kima yankaka, mpe kukuma Muklisto. Ya fwana vwanda mbutukulu ya ngolo ya Mpeve; ya kieleka, yina ke na kufwa, ke na kuboka, ya kulala kuna tii yandi me kufwa mbala zole. Beno bambuka moyo, luzingu lenda basika kaka na lufwa.

<sup>169</sup> Mbuma ya disangu, kana ya ke zinga, ya ke vwanda kaka swi, ya ke vwanda diaka ve kulutula mbuma yina ya disangu. “Kana mbuma ya blé kubwa na ntoto, yawu ke vwanda kaka swi.” Kasi ntangu ya ke kubwa kuna, ya ke pola, ke kota bambumbu, mpe na kati-kati ya kupola ke kwisa nkuna ya luzingu yina ke pesaka yawu luzingu mpe ke butisa yawu mingi.

<sup>170</sup> Kana ti dibuundu kubutuka mbala zole, kufwa na ba-credo ya yawu mpe ba-théologie, mpe nionso yina, mpe kubotama ya malu-malu ya Mpeve ya Nzambi, ya ke vwanda kiboba, ya madidi, ya misiku, ya kukondwa busantu, ya tiya ve madidi ve. Amen. Ya kele kieleka. Ya kele mutindu ya ntama, ya malongi ya mutindu ya ntama, kasi ya ke vulusa nge, mpangi-bakala. Ya kele kieleka. Ya ke keba beno ntangu kitembo ke bula ngolo. Ya me kotisa mbote bansimbulu mpe me dinda na kati ya ntoto. Beno katula mvindu nyonso na ntuala ya kutiamuna beto ya beno; beno tala, ya kele kieleka, mpe kizundu ke kulumuka mbote mpe ke kangama. Oh, mpangi, yinki kilumbu yina beto ke na kuzinga; nsungi ya dibuundu ya ngaanda, tiya ve madidi ve! Yinga, tata.

“Na mabuundu sambwadi,” tubaka, “fidisa nsangu yayi.”

<sup>171</sup> Ntangu yayi, na nsungi ya dibuundu yina, bawu bandaka na kukota; bawu kotaka na kusambila biteki. Bawu ke sala kima mutindu mosi ntangu yayi; bawu me kota, na kusalaka kima mutindu mosi. Mpe na yina, me kwiza Buklisto ya misiku, me banda na kumwangana tii beto ke kuma na nsungi ya dibuundu ya nsuka.

<sup>172</sup> Ntangu yayi, dibuundu ya bilumbu yayi, yina beto ke bokilaka “denomination.” Beto bantu ya busantu, beno zaba, beto ke bokilaka bawu, “ya bilumbu yayi,” mpe bawu ke kwenda kuna mpe bawu ke banda reveil ya bawu, mpe. Beno ke tuba, “Bawu ke na kukuma kisika mosi ve.”

173 Kasi ntangu yayi beno vingila kaka minuti. Yinki beto kele na yawu? Beto kele na kima ve, kulutila ve na yina bawu kele na yawu. Ya kele kaka kieleka. Ntangu nyonso yina beto ke swana mpe ke dasuka mpe ke sala nyonso na kati-kati ya mosi na yankaka, beto ke tambula kaka mutindu bantu; tii kuna bakala mosi ke kulumuka na chaire mpe ke sungama na Nzambi, tii kuna yandi lenda yambula bima ya fioti mpe kukwenda na ntwala mutindu Muklisto fwana sala. Nzungu lenda bokila ve kikalungu ndombe. Kieleka. Beno nganina bawu ve. Beto sukula bimatinu ya beto mosi ntete.

174 Beno lemvokila beto, banzenza, mu ke pesa dibuundu mwa Nsangu ya mbote ntangu yayi. Beno tala, ya kele kieleka. Ya kele kaka yina beno kele na yawu nsatu.

175 "Oh," beno ke tuba, "beto kele na Yawu." Mpe beno ke telama kuna mpe beno ke bula piano ngolo mingi mutindu ya lendaka kwenda, mpe kinkuku ya ba-drum, mpe beno ke kima mbangu na zulu mpe na ntoto, mpe ke basika mpe ke swana na mfinangani ya beno. Beno kele na kima mosi? Uh-huh. Ve, tata. Kima kaka beto kele na yawu kele tiya ve madidi ve. Ntangu muziki ke na kutambula, beto ke tambula. Ntangu musiki ke sukisa, beto ke sukisa. Mpangi, beno bokila ve muntu yankaka kima mosi; beto tala pene-pene ya kyelo ya beno mosi, ntete. Amen.

176 Mu ke tuba na beno, beto kele na nsatu ya reveil ya mutindu ya ntama mutindu beto vwanda salaka kuna na kizunga, ntangu bawu vwandaka lala na kizizi ya bawu mpimpa ya muvimba. Ve samu na kulandila, kasi ntangu mawa ya kieleka ya busantu; mpe kuvutuka ve na autel mpe kubikana, kasi bawu vwandaka basika kuna mpe ba vwandaka sungika yawu na bamfinangani ti bawu salaka yimbi, mpe ba me sungika yawu. Beno zaba ti ya kele kieleka. Ya ke na kukalataka beno, kasi, mpangi, ya ke sadisa beno. Ya kele kieleka. Beno fwana zaba yawu, nkundi ya munu. Yinga, tata.

177 Muntu yina kele tiya ve madidi ve, yina kele kondisyo ya kulutila yimbi samu na dibuundu na kuvwanda mutindu yina. Beno ke tala ve mbote, Branham Tabernacle kele mutindu mosi yina. Beno kuwa, beno zaba bima yayi. Ba me longa yawu, mvula na manima ya mvula, na manima ya mvula, na manima ya mvula, na zulu ya estrade yayi, kukebisa beno na bima yayi ke na kwiza. Ntangu, Biblia ke tuba ti ya ke vwanda na ntangu yina ba ke kwenda na esete na wesete, mpe node mpe sude, na kumekaka na kuzwa Ndinga ya kieleka ya Nzambi, mpe kondwaka na kumona Yawu. Beno ke sala mbote na kukangama, kisika beno zaba kisika beno kele ya kutelama.

178 Kasi ntangu bakala mosi me butuka mbala zole; ve yina me salama na emotion, ve mwa luzabu, ve na kutulaka nkumbu ya yandi na buku ya dibuundu, ve na kukumaka ya dibuundu

ya kulutila nene na kati ya mbanza. Kasi ntangu kieleka yandi bokaka, mpe bondilaka, na masa ya meso na meso ya yandi, tii kuna Nzambi me lemvokila masumu ya yandi, me sukula moyo ya yandi na luzingu ya disumu, mpe me fulusa yandi na Mpeve-Santu; na zola ya mutindu yina, mpe ya busantu, tii yandi ke vutula na bawu bapiné ya ntama, yina yandi yibaka na bamfinangani, mpe ke kwenda mpe ke sala bima yayi, mpe ke zinga na busantu na ntwala ya bantu. Beto ke kuzwa ata mbala mosi ve réveil na kizunga yayi tii beto ke kuzwa yawu.

<sup>179</sup> Lufundusu ke bandaka na yinzo ya Nzambi, na nzila ya Ndinga ya Nzambi. Amen. Buku ve, kasi Biblia. Ve yina dibuundu mosi ke longaka na théologie ya bawu, kasi yina Nzambi ke tubaka. Na yina beno ke kuzwa réveil kisika bangolo ya nene, mpe mambu ya ngitukulu, mpe bidimbu, mpe bimangu, mpe nyonso yankaka, ke salama.

<sup>180</sup> Beto kele tiya ve madidi ve. Samu ti beto kele mwa-tiya ve madidi ve na nsungi yayi, Nzambi tubaka, “Mu ke luka nge na yinwa ya Munu.” Ba ke losa nsungi ya dibuundu yayi. Ya ke vwanda na bayina bikanaka na yawu, yina ke kuzwa mpulusu. Na yina kulutila mbote beno kuzwa kidimbu ya beno, kieleka mbote, samu na kumona kana beno kele na kati ya ndambu yina ntangu yayi. Beto ke kota na yawu na minuti mosi, kana Nzambi zola. Beno tala kaka ntangu yayi.

*Mpe mu balukaka samu na kumona ndinga yina zonzaka na munu. Mpe ntangu mu balukaka, (Beno tala.) Mu monaka minda sambwadi ya wolo; . . .*

<sup>181</sup> To, “makulu ya mwinda,” ba-Grec ke tuba. Ntangu yayi, ya kele mbangululu ya ntete, samu ti bawu vwandaka ve na ba-candidat mpe. . . Bawu vwandaka na mwa dikulu ya mwinda. Ntangu yayi, Minda Sambwadi ya Wolo, beto ke bokilaka yawu.

<sup>182</sup> Ntangu yayi, na kisika ya santu, kisika dimpa ya kulakisa; mpe mingi ya beno banganga-Nzambi ke bakula, mpe yina. Mpe beno bantu awa na tabernacle, yina ba me longa na mulongisi ya mbote awa, beno—beno zaba bima yayi.

<sup>183</sup> Minda Sambwadi ya Wolo, bawu vwandaka. . . vwandaka na mwa minda na zulu ya yawu, mafuta yango ya kuyoka. Kuna Zacharie, kisika yandi monaka vision, mu banza ti ya vwandaka, mpe yandi monaka yinti ya olive mpe yinti ya olive ya olive; ba-Juif mpe Bantu ya makanda, na ntwala ya nsungi ya Bantu ya makanda. Ba vwandaka na ba-encensoir ya wolo, mpe ba-encensoir yayi nionso zole ya wolo ke kota na yayi mosi ya mwinda awa yina pesaka mafuta samu na minda nionso. Mpe yandi vwanda bakula ve mutindu bima yayi vwandaka; yinti ya olive ya mfinda mpe yinti ya olive ya nseke. Mpe yinti ya olive, ya kieleka, ba bukaka yawu, mpe yinti ya olive ya mfinda ba namikaka yawu.

<sup>184</sup> Mpe mafuta yina na mwinda, *mafuta* ke monikisa “Mpeve-Santu,” ntangu nyonso. Beto ke kota na yawu, na kutulaka kidimbu ya bantu, na Kilumbu ya tanu na nkokila. Beno tala, kasi mafuta yayi ke monikisa Mpeve-Santu. Ya kele samu na yina beto ke pakula bambevo na mafuta, ya kele samu ti ya ke monikisa Mpeve-Santu.

<sup>185</sup> Biblia ke tuba, na Apocalypse kapu ya 6, ntangu mpasi lutaka, yandi tubaka, “Kilo mosi ya faline samu na mbongo mosi, mpe bakilo zole ya oloze samu na mbongo mosi ya kisengo; kasi kusala ve vinu ya Munu mpasi mpe mafuta ya Munu.” Kana beto zolaka baka Apocalypse, na mwa basabala, mpe kukota na yawu, nani vinu yina mpe mafuta kele. “Beno me mona ti beno ke nyongisa ve vinu ya Munu mpe mafuta ya Munu. Beno belama na yawu ve.” Amen.

<sup>186</sup> Ntangu yayi, beno tala minda yayi ya wolo. Mafuta yayi tiamukaka na kati ya minda yayi. Ntangu yayi, mafuta vwandaka yina ba tulaka na mwinda, samu na kuyoka. Ntangu yayi, Aaron vwandaka. . . Ya vwandaka kisalu ya yandi na kupelisa minda yayi. Mpe minda yayi zolaka vwanaka ya kulezima. Beno simba yawu ntangu yayi. Beno tala. Beno vwanaka na buzitu, mpe beno kuwa. Minda yayi zolaka vwanaka ya kulezima na tiya yina Nzambi vwandaka pelisa. Bana ya babakala ya Aaron kwendaka na tiya mosi ya ngitukulu, mpe Nzambi kufwaka bawu na kyelo; ya kele kieleka, tiya ya ngitukulu. Tiya yina Nzambi bandaka!

<sup>187</sup> Mpe beno tala mbote, ntangu yayi, minda kimaka na kati ya sanduku. *Awa* vwandaka mwinda mosi, zole, tatu, yiya (ntama), tanu, sambanu, sambwadi, mutindu *yayi*. Ntangu yayi, minda yango ya wolo awa, mutindu yandi ke tuba na baminuti fyoti.

<sup>188</sup> Beto tanga mwa ntama, mu banza ti beto ke kuzwa yawu. Mpe beno kuwa yina yandi tubaka ntangu yayi. Mbote mingi. “Mpe yintu ya Yandi. . .” Mu banza ti mu kele na ntuala ya nzila ya 12 kuna, “Minda Sambwadi ya Wolo.” nzila ya 13:

*Mpe na kati-kati ya minda sambwadi ya wolo mosi mutindu. . . Mwana ya muntu, ya kulwata robe ya yinda tii na makulu, mpe na mukaba ya wolo na ntulu.*

*Yintu ya yandi vwandaka mutindu—mutindu. . . bansuki ya yandi vwandaka mpembe mutindu mika ya dimeme, . . . mpembe mutindu mvula-mpembe; mpe meso ya yandi vwandaka. . . milaka ya tiya; . . .*

<sup>189</sup> Ntangu yayi, beto telema fioti kuna, samu beto lenda bika foto yina kuna mutindu yina ve. Beno tala minda yayi ya kutelama awa ntangu yayi. Mbote, minda yango, mutindu beto ke mona fyoti na ntuala, ke monikisa Bansungi Sambwadi ya Dibuundu. Bawu talisaka Ephèse, Pergame, mpe landilaka tii Philadelphie, mpe tii na Laodicée; Bansungi Sambwadi ya Dibuundu.

<sup>190</sup> Mpe mosi na mosi ya mwa minda yayi vwandaka na mwa diyuki ya mafuta ya kuvwanda kuna, mpe mafuta yayi vwandaka yokama na zulu ya mwinda yayi. Ntangu yayi ntangu ba vwandaka pelisa mwinda mosi na tiya ya Nzambi, ba bakaka mwinda yina mpe vwandaka pelisa yankaka, na manima ba vwandaka vwandisa yawu; mpe vwandaka pelisa yina yankaka; mpe mosi vwandaka pelisa yankaka, vwandaka pelisa yankaka, vwandaka pelisa yina yankaka, tii mwinda ya nsuka. Beno tala, mafuta mosi.

<sup>191</sup> Ntangu yayi, Bansungi Sambwadi ya Dibuundu, bandaka na Ephèse, mpe Thyatire, Pergame, mpe kulandila. Mpe Mpeve-Santu, yina kele Mafuta ya Nzambi, kubwaka na dibuundu na mbandukulu, na Ephèse, dibuundu ya Ephèse, yina vwandaka dibuundu ya lemvo. Beno ba-Baptiste zolaka boka “amen” kuna. Mpe kuna na dibuundu ya lemvo, yina na Ephèse, mpe mukanda ya Ephèse tulaka beto na ngaanda, nani beto vwandaka ntete mbandukulu ya yinza. Yawu kubwaka kuna, mpe bawu kuzwaka Mpeve-Santu.

<sup>192</sup> Kasi beno vingila fioti, mpangi ya muni ya Baptiste, wapi mutindu bawu kuzwaka Yawu? Wapi mutindu bawu kuzwaka Yawu? Na kukumaka mabele ya dibuundu? Ata mbala mosi ve. Ba kele na Yawu na nzila ya mbotika ya Mpeve-Santu. Beno ke tuba, “Yinga, Mpangi Branham, ya kele kieleka.” Yinki salamaka na beno ntangu Yawu kubwaka na zulu ya beno?

<sup>193</sup> Beno tala, Tiya mosi yina yokaka mafuta kuna, na Ephèse, yokaka yawu na Thyatire; Tiya mosi yina vwandaka yokaka kuna, yokaka yawu na Pergame; yokaka bisika nionso, tii na Nsungi ya Dibuundu ya Laodicée. Mpeve-Santu mosi yina, ke pesa nsemo na Nzambi mosi, na nzila ya Tiya mosi. Mpe Tiya yina kubwaka na zulu ya Pantekote me pelisa mwinda, Dibuundu, na nzila ya bansungi nyonso, kaka ntangu yayi.

<sup>194</sup> Kasi dyambu ya yawu kele, beto ba-Baptiste, beto ba-Méthodiste, beto kele ntama mingi *awa*, na kumekaka na kuzwa kima mosi ya disolo, mpe tala Dibuundu *awa* na yisi. Ya kele kieleka. Ya kele kisika beto me bikana na manima. Konso dibuundu, ntangu ya bandaka, ya vwandaka ve . . .

<sup>195</sup> Beno tala Luther, na kusungika ya ntete. Wapi mutindu ya réveil, Luther. Beno tala, mu kele na buku ya yandi na yinzo. Mutindu muntu yina ningisaka na yisi ya ngolo ya Nzambi! Mutindu yandi kwikilaka na kubeluka ya Kinzambi, ndimaka Yawu yandi mosi; kwikilaka na ngolo ya Nzambi, ata mpe, tii yandi zonzaka na bandinga, Martin Luther. Ya kele kaka kieleka. Martin Luther kuzonzaka na bandinga.

<sup>196</sup> Mpe kuna nsungi yina landaka kulumukaka, John Wesley. John Wesley salaka kima mutindu mosi. Ntangu yandi vwandaka longi, yandi tubaka, “Yinki kele bampova yayi yina mu ke nyunguta, yina me zabana ve?” Ya kele kieleka, kuzonza na

bandinga; kukwikila na kubeluka ya Kinzambi. Mpe ntangu yandi kwizaka na Amerika, mabuundu awa salaka yandi mutindu bawu ke salaka ba-exalté bubu yayi, ba basisaka yandi, na mabuundu. Mpe bawu longaka Nsangu ya mbote kuna, mpe kubwaka na yisi ya ngolo ya Nzambi, tii kuna bawu lalaka na ntoto, mpimpa nyonso na ntangu mosi.

<sup>197</sup> Mpe buku ya John Wesley, yina mu kumaka na yinzo ntangu yayi, kisika yandi vwandaka na zulu ya mpunda kilumbu mosi, samu na kusambila samu na kento yina vwandaka ya kubela, mpe mpunda kubwaka mpe bukaka dikulu ya yandi. Mpe yandi basikaka na mpunda, mpe bakaka diyuki ya mafuta mpe pakulaka mpunda na mafuta, mpe mataka na zulu ya yandi mpe kwendaka. Tiya mosi yina vwandaka pela kuna.

<sup>198</sup> Kasi beno me tala yawu na mutindu ya kinkulu ya kima mosi, mpe Mpeve-Santu ke landila na kukwenda na ntwala. Kieleka. Ya kele kieleka.

<sup>199</sup> Mpe na dibuundu ya ba-Methodiste, “Bawu kele na kima mosi ke tambula mbote ve na bawu,” na nzila ya . . . buku ya bawu tubaka, “bawu kele na mabulu ya masa.” Mpe bawu zolaka banda na kutambula, mpe bawu zolaka dumuka mpe kudumuka, mpe kusala mutindu *yina*, na balukutakanu ya bawu ya tenta mpe nionso yina, ba-Methodiste. Na yina, mpangi-bakala, kana John Wesley lendaka kota na kisalu, yandi ke vwanda na nsoni mingi samu na beno, yandi ke manga beno; kana ti yandi pesa beno Nsangu ya mbote ya mbote yina ke bula na Nsangu ya mbote yina yandi longaka.

<sup>200</sup> Mu telemaka ntama mingi ve, pene-pene ya tempelo, kisika ba kangaka bawu bansinga, kilumbu yina ntangu yandi vwandaka longa mbutukulu ya malu-malu, mpe nionso yina, mpe yina. Mpe dibuundu ya nene ya Angleterre yambulaka bayimbwa na zulu ya bawu. Mpe yandi tubaka, “Mwini ke kubwa ve na zulu ya yintu ya nge bambala tatu, tii kuna nge ke bokila munu na kusambila samu na yandi.” Mpe yandi salaka yawu; mpe kufwaka. Ya kele kieleka. Kieleka.

<sup>201</sup> Yawu yina beto ke na yawu nsatu bubu yayi. Beto ke na yawu nsatu ya ba-Methodiste. Beto kele na nsatu ya ba-Baptiste yankaka mutindu John Smith, yina bikanaka na kati ya kivinga mpe na lakanaka na Nzambi, mpe sambilaka mpimpa ya muvimba, na mutindu mosi, tii meso ya yandi kumaka yimbi mingi, na suka, kento ya yandi zolaka twadisa yandi na mesa, samu na kudya.

<sup>202</sup> Oh, yinki beto ke sala bubu yayi? Beno telama na nsongi, na fumu na yinwa ya beto; mpe diakre mosi na kati ya dibuundu, mpe ke kulumuka kuna mpe ke sala mutindu yina; samu na kutala ba-film, mpe kutala televizyo mpimpa ya muvimba; mpe kubikana ntama na dibuundu; kunwa tabaka, kubula bansaka

ya mbongo, kukima mbangu na bampunda, mpe kubokila beto mosi ba-Baptiste. Buzoba nionso!

203 Yina beto ke na yawu nsatu bubu yayi kele reveil ya mutindu ya ntama, yina Nzambi tindaka, ya Mpeve-Santu. Amen. Mu zola tuba ve. . . Mu ke na kumeka ve na kunata beno na nsayi. Mu zaba ti beno kele ve na nsayi, kasi, mpangi, ya kele kieleka. Na kumekaka na kulakisa beno. Ya kele kieleka. Ya kele yina beto ke na yawu nsatu. Mbote mingi.

204 Ntangu yayi, ya kele Biblia. Ya kele yina Mpeve ke tuba, beno me mona. "Minda." Mbote mingi. Ntangu yayi nzila ya 13.

*Mpe na kati-kati ya minda sambwadi ya wolo mosi mutindu. . . Mwana ya muntu, . . .*

205 Yinki? Mosi mutindu Yandi. Nani vwandaka yayi? Kento ya Yandi ya makwela. Mosi mutindu Yandi. Beno tala mbote mutindu ya vwandaka.

*. . . ya lwataka robe ya yinda tii na makulu, . . .*

206 Busantu ya Yesu Klisto ke fika Yandi. "Me sukula beto na masumu ya beto na Menga ya Yandi Mosi." Mbote mingi.

*. . . na mukaba ya wolo (bakala ve; kento) na ntulu.*  
(Nsangu ya mbote yina simbaka ngolo mpe nkembo ya Nzambi na zulu ya Nzutu ya Klisto.)

207 Oh, wapi kizizi ya kitoko beto kele na yawu awa na yisi ya kutala mbote. Beno tala awa.

*. . . tii na makulu, mpe na mukaba ya wolo na ntulu.*

*Yintu ya yandi mpe bansuki ya yandi vwandaka mpembe mutindu mika, . . . mpembe mutindu mvula ya mpembe (ludedomo, busantu; mpembe zola kutuba); mpe meso ya yandi. . . mutindu milaka ya tiya; (Ya ke talana kaka na kati ya yawu.)*

208 Beno meka ve na kubumbama na Yandi. Yandi zaba nani beno kele, kisika beno kele, mpe yina beno salaka. Yinga, tata. Yandi ke mona nyonso. O Nzambi. . .

209 Beto kele kaka na baminuti fyoti kana mu kuma na nsungi ya dibuundu yankaka yayi, kana beto lenda. Beno tala.

*Mpe makulu ya yandi vwandaka mutindu. . . kisengo ya tiya, . . .*

210 *Kisengo* ntangu nyonso kele "lufundusu," beno zaba; autel ya kisengo, mpe nyoka ya kisengo, mpe nyonso yankaka yina. *Kisengo* ke zonzila lufundusu. Makulu ya Yandi, kuna, Dibuuundu ya Yesu Klisto kele ya kuvwanda na zulu ya lufundusu ya Kinzambi. Klisto vwanda kufwa na kisika ya beto, Kaka Mosi vwandaka futa lufundusu ya beto kuna, na. . . na ntwala ya Nzambi, mpe kufwaka kuna mutindu musumuki na zulu ya kulunsi, mpe moyo ya Yandi kulumukaka na difelo. Mpe Nzambi, ke mona mpasi ve Muntu ya Yandi ya santu kumona



kupola, kuvumbula Yandi na lufwa na kilumbu ya tatu, samu na kunungisama ya beto; Nani me vwanda na diboko ya Yandi ya kibakala ntangu yayi, Nganga-Nzambi ya Mbuta lenda simbama na bansatu ya bimbevo ya beto; yina ke vutuka mutindu na nsalulu Yandi kotaka na Mazulu, samu na kuzwa Dibuundu ya nkembo yina Yandi mosi me kubama, yina ba me sukula na Menga mpe yina me butuka zole. Yinki—yinki vision. Amen. Mbote mingi. “Mutindu kisengo ya mbote,” to, ntangu yayi beno tala mbote, “mpe ya Yandi . . . mpe . . .”

*Mpe makulu ya yandi vwandaka mutindu . . . kisengo ya tiya, mutindu kana ba yokaka yawu na tiya na kati ya dibulu ya tiya; (Ya me katula mvindu nyonso.) mpe ndinga ya yandi . . . ndinga ya bamaza mingi.*

<sup>211</sup> Beno tala mbote, ya kele Dibuundu ke na kuzonzaka na Yandi ntangu yayi, *bamaza*. Apocalypse 17:15, me tuba, “Bamaza zola kutuba lutangu ya bantu mpe bantu mingi.” Ntangu yayi, “Ndinga ya Yandi,” to Muntu yayi vwandaka ya kutelama kuna ke tala mutindu yayi, Klisto na kati ya Dibuundu ya Yandi, mutindu Kento ya makwela mpe Klisto kele Mosi, mutindu bakala mpe kento kele mosi; Dibuundu mpe Klisto na kuvwandaka ya kusala kintwadi na Muntu mosi, Mpeve-Santu mosi.

<sup>212</sup> Mpe bima yina Klisto salaka, Dibuundu mpe ke salaka yawu. Beno me mona yawu? Dibuundu yina ya kitoko kuna na busantu, na ngolo, na bunene, na kumona ba-vision, bidimbu, mambu ya ngitukulu. Nyonso kaka mutindu Yandi salaka, awa ya kele na zulu ya ntoto; ke pesa lukumu nyonso na Nzambi, na kutubaka, “Mu lenda sala kima ve kana ti Tata kulakisa Munu; kasi Yandi lakisaka Munu, mpe awa ya kele.” Mpe beto ke kwisa, beno me mona, bima yayi ke salama.

<sup>213</sup> Ntangu yayi, Klisto, tutaka bambuma na kati ya Mosi.

*. . . mpe ndinga . . . ya bamaza mingi . . .*

Bantu mingi, kaka yina ve; ya vwandaka Dibuundu ya muvimba, Mabuundu Sambwadi ya ba tutaka bambuma kintwadi na kati ya Nzutu mosi ya nene ya Mfumu yina pesaka luzingu mutindu munkayulu. Ba-Méthodiste, ba-Baptiste, ba-Presbytérien, nyonso yina me butuka mbala zole na Mpeve-Santu, na kuzonzaka na ngolo ya Nzambi, ya kele Nzutu. Ya kele Nzutu.

*Mpe yandi vwandaka na diboko ya yandi ya kibakala . . .*

<sup>214</sup> “Kieleka.” Nyonso na kati ya Biblia kele na mbangululu na yawu, beno me mona.

*. . . na diboko ya yandi ya kibakala bambwetete sambwadi (ntangu yayi Yandi—Yandi kele Ntinu): mpe na yinwa ya yandi mbele ya meno zole: mpe kizizi ya*

*yandi vwandaka mutindu mwini ke na kusema na ngolo ya yandi.*

215 Ntangu yayi, “Na yinwa ya Yandi mbele ya meno zole,” na yinwa ya Yayi ya kutelama kuna, Klisto mpe Dibuundu mutindu mosi.

216 “Na diboko ya Yandi Yandi simbaka bambwetete sambwadi.” Mpe beno ke mona na mwa minuti fioti; mu zola tubila yawu, bika Biblia kutuba kaka yina ya vwandaka. Ya vwandaka milongi sambwadi, longi mosi na konso nsungi ya Bansungi Sambwadi yayi ya Dibuundu, yina basikaka, simba bawu na diboko ya Yandi ya kibakala. Amen. Yandi yayi. Ya vwandaka na bawanzio sambwadi, minati-nsangu sambwadi, mosi na mosi ya dibuundu. Beno me bakula yawu?

217 Kuna, Yandi kele ya kutelama kuna.

*. . . mpe na yinwa ya yandi mbele ya meno na balweka nyonso zole: . . .*

Yinki kele mbele ya meno zole? Hebreux kapu 4, me tuba, “Ndinga ya Nzambi kele ya nsongi mingi, ngolo mingi kulutula mbele ya meno zole, mpe ke kwenda na mafuta ya mukwa, mpe Mufundisi ya bansatu ya dibanza.” Mbote mingi.

*Mpe ntangu mu monaka yandi, mu kubwaka na . . . Mu kubwaka na makulu ya yandi mutindu ya kufwa. Mpe yandi tentikaka diboko ya yandi ya bakala na zulu ya munu, na kutubaka . . . Vwanda na boma ve; mu kele ya ntete mpe ya nsuka:*

*Mu kele yandi yina vwandaka moyo, mpe kufwaka; mpe, tala, mu kele moyo mvula na mvula, Amen; mpe mu kele na bafungula ya difelo mpe . . . lufwa. (Ya kele Yesu. Ntangu yayi beno tala mbote.)*

*Sonika bima yayi yina nge me mona, mpe bima yina kele, mpe bima yayi yina ke vwanda na ntuala; (Mbote mingi.)*

*Mpe dinsweki ya bambwetete sambwadi yina nge monaka na diboko ya munu ya bakala, kele. . . diboko, mpe minda sambwadi ya wolo. Bambwetete sambwadi kele bawanzio sambwadi ya mabuundu sambwadi: . . .*

218 Ooh! Beno simba yawu. “Bawanzio sambwadi kele milongi sambwadi ya mabuundu sambwadi.” Ya vwandaka na dibuundu ya ntwadisi ya Ephèse. Ntangu yayi kana Nzambi zolaka pesa muswa, mpe beto zolaka landila na yayi, mpe kubaka ve *Kidimbu Ya Kibulu*, Mu lenda lakisa beno mosi na mosi ya bawu, tii na nsungi yayi ya nsuka, yina nzila—yina mutindu bawu vwandaka; kutalisa beno Dibuundu ya Philadelphie, yina vwandaka ba-Méthodiste, John Wesley; kutalisa beno Dibuundu Thyatire, mbala mosi na manima ya Pergame; yina vwandaka Martin Luther, mpe landilaka kaka na nsungi, mpe kutalisa mosi na

mosi ya bawu yina kwizaka mpe nataka nsangu, tulaka nsangu na ntoto.

<sup>219</sup> Mpe kaka tii na Nsangu ya nsuka, bubu yayi, ya kele kieleka, kisika Nzambi fidisaka Wanzio na Mazulu, kisadi ya Yandi ya kusiamisa, mpe fidisaka Nsangu na muntu nyonso. Yayi ke vwanda dibuundu ve. Ya ke vwanda organisation ve na bilumbu yayi ya nsuka. Samu, Nzambi me tula organisation na zulu ya dibaya, mpe beno nionso me zaba yawu. Mpe beno vingila tii beto ke manisa mbasi na nkokila, na *Kidimbu Ya Kibulu*, mpe kumona kisika dibuundu ya beno kele, beno me mona, mpe organisation ya beno.

Ntangu yayi beno tala mbote mabuundu.

*...mpe minda sambwadi yina nge monaka kele mabuundu sambwadi.* (Yawu kele mabuundu.)

<sup>220</sup> Mpe *bambwetete*, yina, Yandi ke na kusimbaka konso mbwetete. Ntangu yayi beno tala. Beto lenda kaka kutelama minuti mosi? Mu zaba ti mu me bikana na baminuti kumi na zole samu na kukwenda awa mpe mu zola kukuma na kapu yayi kaka awa, mpe kutanga yawu, kana kima yankaka ve. Mu zola kunata yayi na beno. Mbwetete vwandaka longi, mpe longi yina me pakulama na Mpeve yina me katuka na Zulu.

<sup>221</sup> Beno me bakula ti beno ke talisa mbwetete na Mazulu, mpe konso mbwetete na Mazulu ke monikisa beno? Beno zaba ti Nzambi tubaka na Abraham ti nkuna ya yandi ke vwanda mutindu bambwetete ya Mazulu? Ntete bawu vwandaka fundu-fundu ya ntoto, mpe na yina na mvumbukulu ba vwandaka bambwetete ya Mazulu, yina ba lendaka tanga ve. Beno me bakula yawu?

<sup>222</sup> Beno zaba ti Yesu vwandaka Mbwetete yina ke Ngengaka ya Suka, Mbwetete ya kulutila nene ya bambwetete nionso ya Mazulu? Oh, Alleluia! Ntangu mu ke banza na yawu, moyo ya munu ke pumbuka na kyese. Yandi yayi! Kuna na mutindu ya Yandi, na Mvwandulu ya Yandi, beto ke vwanda kilumbu mosi, Alleluia, ntangu bima ya ntoto yayi me luta.

<sup>223</sup> Kasi, beno kuwa, Masonuku yankaka ke kwizaka na munu. Daniel tubaka. . . Ntangu Yandi tubaka, “Kanga . . .”

<sup>224</sup> Ntangu yandi monaka Wanzio yayi kukulumuka, na mukyama na zulu ya yintu ya Yandi; tulaka dikulu mosi na zulu ya ntoto, mpe mosi na mubu; mpe me telemisa maboko ya Yandi, mpe me zenga ndefi na nzila ya Yandi yina ke zinga mvula na mvula. Ntangu bandinga sambwadi yina basisaka yawu. . . Banzasi Sambwadi basisaka bandinga ya yawu. Yandi tubaka, “Tula yawu kidimbu; yandi zabaka ve tii na kilumbu ya nsuka.” Yandi tubaka, “Kasi ntangu dinsweki yayi ya Nzambi ke kumana, ntangu bayayi ke monisama na Dibundu; mpe zengaka ndefi na Yandi ti ke zinga mvula na mvula mpe mvula na mvula, ti ntangu ke vwanda diaka ve.”

225 Beno kuwa yina Yandi tubaka kuna. Yandi tubaka, “Kwenda nzila ya nge, Daniel, kanga Buku.” Beno me mona? “Samu ti nge ke pema, mpe nge ke telama na bilumbu ya nsuka, na lot ya nge. Kasi mingi ya bayina mangaka ludedomo ke sema na bambwetete ntangu nyonso mpe ntangu nyonso.”

226 Beno bawu yayi, “bambwetete,” milongi sambwadi yango. Milongi sambwadi, na nzila ya Bansungi Sambwadi ya Dibuundu, yina ke salaka bamvula mafunda zole.

227 Kubanda bamvula mafunda zole ya ntete, kubeba ya ntama ya yinza; bamvula mafunda zole ya zole, nkwezulu ya ntete ya Klisto; bamvula mafunda zole ya tatu, ya sambanu, kele Nkwezulu ya zole ya Klisto; mpe Millenium, mpe nsuka, kupema ya kilumbu ya sambwadi.

228 “Na dibuundu. . .” Oh, beno ke kanga ntima na munu baminuti fyoti dyaka? [Dibuundu me tuba, “Yinga.”—Mu.] Ntangu yayi, mu zola ve kunyongisa beno, kasi mu ke tanga kaka nswalu ntangu yayi. “Na wanzio. . .” Ntangu yayi beno tala mbote, Yandi ke na kuzonzaka yayi mbala mosi na ntangu yayi. Mpe beto ke kwenda na Pergame mpe ke kuzwa nsuka ya yawu kuna. . . Mu zola kutuba, na Laodicée, mpe kuna beto ke sukisa. Mbasi na nkokila beto ke baka awa, na *Kidimbu Ya Kibulu*.

*Na wanzio ya dibuundu ya Ephèse . . . (Ya ntete.)*

229 Ntangu yayi beno tala mbote, ntangu Yesu vwandaka ya kutelama na maboko ya Yandi na ngaanda. Ya kele awa na mwa kima mosi ya fioti ti mu zola ve kubika na lweka, samu na beno. Beno kuwa yawu. Beno tala yawu mbote. Yandi kele ya kutelama na kati-kati, ya kele kati-kati, ya Minda Sambwadi ya Wolo.

230 Ntangu yayi, kana mu vwandaka ya kutelama *awa*, mpe ti minda ya kifuluka, *awa* na diboko ya munu mosi kele kisika mu basisaka yawu, mpe *awa* kele mosi yankaka, na kidimbu ya kulunsi, samu yawu vwandaka na nzila ya kulunsi yina nataka Dibuundu.

231 Yandi yayi awa; mpe mukyama na zulu ya yintu ya Yandi, mutindu ngwisani. “Mu me sala ngwisani ya Munu na Dibuundu, na nzila ya Abraham, na nzila ya Nkuna ya yandi, nyonso yina ba ke bokilaka.”

232 Mpangi ya munu ya bakala, nkokila yankaka yina, yambaka Klisto, yandi tubaka, “Beno pusa munu ve, Bill.” Yandi tubaka, “Ntangu Nzambi ke zonza na munu. . .”

Mu tubaka, “Nge lenda kwisa ve tii kuna Yandi ke bokila nge.”

233 “Muntu ve lenda kwiza na Munu, kana ti Tata ya Munu kubokila.” Muntu mosi ke sala kima yankaka, ke benda beno, ya kele muntu yankaka. Kasi ntangu Nzambi ke zonza, beno ke

kwiza, beno me mona. Ya kele kieleka. Ya kutelama kuna. . .  
 “Muntu ve lenda kwiza, kana ti Tata ya Munu kubenda yandi.”

<sup>234</sup> Yandi yina ya kutelama kuna, “ke talana mutindu ditadi ya jasje mpe ya sardoine, ya ntete mpe ya nsuka,” Benjamin mpe Ruben, bankooko kumi na zole. Mpe wapi mutindu, Biblia, konso kitini ke vukana kaka kintwadi mutindu yina, bima nionso kele ya kulunga! Beno tala mutindu Yandi kele ya kutelama kuna, samu na kutala ntangu yayi, beno tala mbote yina ke salama. Yandi tubaka ti Yandi vwandaka “Alpha mpe Omega,” Yandi vwandaka “Mbandukulu mpe Nsuka. Yandi yina Vwandaka, mpe yina Kele, mpe Ke Kwiza.” Yandi vwandaka na diboko ya Yandi ya kibakala, ntangu yayi, bambwetete sambwadi.

<sup>235</sup> Ntangu yayi awa Yandi bandaka na Ephèse, mpe Yandi bandaka na kupelisa mwinda. Yandi pesaka yawu nsemo kuna. Na manima nsungi ya kulanda, beto ke mona ti, nsungi ya dibuundu ya kualanda, ya bandakaka na kuzima; na nsungi ya dibuundu ya kulanda ya zimaka dyaka fioti mingi; tii na nsungi ya yiya ya dibuundu, bamvula funda mosi na bankama tanu ya bansungi ya mudidi. Mpe pene ya bamvula 500, 1500, ntama kuna, ya bandaka na kukuma mpimpa mingi tii bawu mataka mingi, mpe yawu zimaka kaka nyonso.

<sup>236</sup> Mpe, beno tala, mosi na mosi ya bansungi yango ya dibuundu, Yandi tubaka, “Nge me manga ve Nkumbu ya Munu. Nge me manga ve Nkumbu ya Munu. Nge me manga ve Nkumbu ya Munu.” Kasi ntangu Yandi ke basika na lweka yankaka ya bansungi ya mudidi, tubaka, “Nge kele na nkumbu yina nge ke na kuzingila, mpe kele ya kufwa.” Yandi salaka organisation. Yandi bakaka nkumbu yankaka ya luvunu.

<sup>237</sup> Beno tala mbote, mbasi na nkokila, yina mbeni ya Klisto kele. Yandi kele na mbotika ya luvunu, ke sala ti beno kwikila ti ya kele mbotika ya Mpeve-Santu. Yandi kele na mbotika ya luvunu (Yinga, tata.), yina kele ve Masonuku. Yandi kele na bima nyonso yina, kaka mingi samu na kumekula, samu na kuvwanda na mayela ya yimbi mpe mayela ya luvunu.

<sup>238</sup> Beno tala mbote kisika ya me katuka. Kaka ya kele kisika ya bandaka, kaka na kati kuna; me basika na lweka yayi yankaka awa.

Na yina Yandi tubaka, “Nge kele kaka na Nsemo ya fyoti,” Luther.

<sup>239</sup> Na manima Wesley kwisaka, mpe mutindu ya vwandaka na nsungi ya yandi. Ya bandaka na kusema.

<sup>240</sup> Na yina, kubanda kati-kati ya nsungi yina mpe nsungi ya nsuka, Yandi tulaka kielo ya kuzibuka. Yandi tulaka kielo ya kuzibuka samu na bayina ke kota. Na yina Yandi tubaka, “Yandi kotaka na kisika ya tiya ve madidi ve.” Mpe Yandi ke basisa yawu na yinwa ya Yandi. Bakaka yina bikanaka, mvumbukulu ke kwisa, mpe Yandi kwendaka na yawu. Ya kieleka.

241 Yandi yayi, ya kutelama na kati ya Minda Sambwadi ya Wolo. Ntangu yayi:

*Na...dibuundu ya Ephèse sonika; Bima yayi...  
sonika; Bima yayi yina me tuba yandi yina me simba  
bambuetete sambwadi na diboko ya yandi ya kibakala,  
yina ke tambula na kati-kati ya minda sambwadi ya  
wolo;*

242 “Mu zaba bisalu ya nge.” Beno bambuka moyo, ba me zimbana nge ve.

*Mu zaba bisalu ya nge, mpe mpasi ya nge, mpe  
mvibudulu ya nge, mpe...nge lenda ve kunata bawu  
yina kele yimbi:...*

243 Mpe beto ke tula kaka na kima yina kele yimbi, mpe ke bokila yawu nsambulu. “Oh, mbote, bawu ke kwenda...Beto ke kwendaka na yinzo-Nzambi. Beto kele mbote mutindu bantu yankaka.” Beno ke kwenda kaka na yinzo, beno ke bikana na yinzo na Kilumbu ya tatu na nkokila mpe beno ke tala televizyo, mabulu ya nene ya difelo. Ya kele kieleka. Mpe ke basika kuna mpe ke kuwa cinema, na kitangilu. Ya kele tiya mingi na kukwenda na kutalisa, mpe...na dibuundu; mpe ata mpe mulongi ke kanga, na kati-kati ya été. Beno ke tuba, “Mwini kele ngolo mingi na kukwenda na yinzo-Nzambi.” Ya kele ve, kuvwanda yimbi mingi, na kukwenda na difelo, mpangi. Beno ke kwenda, mosi ya bilumbu yayi, kisika mwini kele ngolo mingi kulutula yina. Beno fwana kuwa mbote.

244 Yinki mutindu nge lenda? Mpangi-bakala, nge lenda sala yembe ve kudia mpunda ya kufwa, kana nge lendaka sala yawu. Yandi lendaka sala yawu ve. Nkadulu ya yandi kele ya kuswaswana. Yembe kele na ndulangundu ve. Yandi lenda ve kunika yawu.

245 Mpe muntu yina me butuka mbala zole, ya Mpeve ya Nzambi, lenda ve kudya bima yina. Yandi lenda ve kukanga ntima na yawu. Yawu me basika na mabanza ya yandi. Yandi lenda sala yawu ve. Yandi lenda ve.

246 Beno zaba yawu. Bandeke ya mansala mosi ke pumbukaka kintwadi. Mpe, bubu yayi, yinza mpe dibuundu kele mingi mutindu mosi, beno...Bawu ke tuba mutindu mosi, bawu ke kunwaka mutindu mosi, bawu ke kunwaka tabaka mutindu mosi, bawu ke zengaka ndefi mutindu mosi, bawu ke lwataka mutindu mosi, bawu ke salaka mutindu mosi. Mpe bawu, beno lenda ve kutuba mosi na yankaka, mpe kasi beno fwana vwanda ya kutula kidimbu na nzila ya Mpeve-Santu.

247 Yina kele boma ya ngolo, mpangi ya bakala, kasi, mu ke tuba na beno, ya ke pesa beno Luzingu.

248 Ya vwandaka na muntu mosi, kilumbu mosi, yina kwendaka na nkonga ya milongi, kisika ba vwandaka na seminere, ba

bokilaka lukolo ya baprofete. Mpe mosi ya bawu tubaka, “Tula mbungu ya nene ntangu yayi. Beto ke kuzwa mwa madia ya midi.” Yandi tubaka, “Elie kwisaka, muntu yina kele kieleka na bitini zole.”

<sup>249</sup> Na yina mosi ya bampangi kwendaka kubaka mwa—mwa ba-pois, mpe yandi kuzwaka kinkuku ya kifuluka ya mantete ya vert mpe tulaka yawu na kati ya nzungu, mpe bandaka na kutokisa yawu. Na yina, bawu bandaka na kudya. Bawu tubaka, “Ya kele na lufwa na kati ya mbungu.” Ya kele kaka mutindu mwa baseminere yayi lendaka kulamba, mpe. Ya kele kieleka. Yandi tubaka, “Ya kele na lufwa na kati ya nzungu.”

<sup>250</sup> Elie tubaka, “Vingila fioti, beto ke keba yawu.” Yandi ke kwenda mpe ke kuzwa diboko ya faline, mpe ke kotisa yawu, na yina bima yina ke sobaka. Faline, munkayulu ya faline, “Yesu Klisto mutindu mosi mazono, bubu yayi, mpe kukonda nsuka,” bambuma ya ntoto mutindu mosi, samu na munkayulu ya faline, mpe ya salaka luswaswanu.

. . . lenda ve kutelamina bawu na yina kele yimbi: mpe nge me meka bawu yina ke tuba ti bawu kele milongi, to, bantumwa, mpe bawu kele ve, mpe me mona bawu kele bantu ya luvunu:

<sup>251</sup> Ya kele yina Yandi tubaka; mu me tubaka yawu ata fioti ve. Mu ke na kutangaka kaka Yandi. Kasi beno zaba yina Nzambi ke lombaka? Nzambi ke lombamba mbotika ya Mpeve-Santu, to beno me zimbana.

<sup>252</sup> Mpe bakala mosi awa na ba-Doctorat ya Théologie, mpe ya Doctorat ya Droit, mpe Doctorat ya Philosophie, mpe diplôme ya Licencié na Lettre, mpe bima yankaka nionso na manima ya yawu, mpe ntangu yankaka beno zaba mingi ve samu na Nzambi kulutula kima mosi. Ya kieleka. Mpangi-bakala, yina zola kutuba kima mosi ve. Kasi yinza ya muvimba ke tuba, “Mbote, mulongi ya beto kele Docteur ya Théologie.” Oh, kyadi. Yina kele dyaka ve na kima ya kusala na Nzambi kulutula—kulutula kunwa maza; ya kele kieleka ve. Ya kele kieleka. Nzambi ke kipe ve ba-Doctorat ya Philosophie, to ba-Doctorat ya Droit. Mpe—mpe beno zaba yina Biblia ke bokilaka. . . Ntangu yayi, yayi kele nsaka ve, samu ti mu ke kwikilaka ve na kutuba na bawu. Kasi Biblia ke bokilaka Théologie, “yimbwa ya kufwa.” Ya kele kieleka yina Biblia ke tuba ti ya vwandaka, “yimbwa ya kufwa.” Mbote mingi, yandi tubaka, “Bawu lenda ve bwatu.” Na yawu, kuna, mbote mingi.

*Mpe me vibidila, mpe me vwanda na mvibudulu, mpe samu na lukumu ya nkumbu ya munu. . .*

<sup>253</sup> Oh, mu zola kotisa yawu, na yina beno ke kuzwa yawu na mwa bankokila, kana Nzambi zola.

. . . me sala, mpe me nionga ve.

254 “Nge vwandaka kaka na Yawu.” Mbote mingi. Beno tala.

*Kasi mu kele na mwa bima yina ke telemina nge, . . .*

255 Ntangu yayi, awa kele kisika mu fwana kwenda ntangu yayi, samu na mwa ntangu fioti, tii kuna mu ke kuzwa yayi awa samu beto simba yawu mbasi na nkokila.

*. . . kele na mwa bima yina ke telemina nge, samu ti nge me bika zola ya nge ya ntete.*

256 Yinki diambu na tabernacle? Muntu fwana vwanda na lenda ya kutuba, ntangu beno ke kutana na muntu mosi, “Ya kele banzingilu ya beno ya Baklisto, wapi ntangu ya vwandaka ya kulutila mbote samu na beno?”

Beno fwana vwanda na lenda ya kutuba, “Kaka ntangu yayi!”

257 “Mbote, kimbangi ya munu ya kulutila mbote vwandaka na manima ntangu mu kuzwaka ntete mbotika ya Mpeve-Santu, ntangu mu kwizaka.”

258 Na yina beno tuba, “Oh, mpangi, nge me kubwa na lemvo.” Ya kele kieleka. Beno tala.

*. . . me bika zola ya nge ya ntete.*

Na kulakisaka ti bawu vwandaka na kima na mbandukulu, mpe me bika yawu.

259 “Ve yandi yina ke banda; kasi yandi yina ke vibidila tii na suka, mutindu mosi ke kuzwa mpulusu.” “Ve yandi . . . bayina nionso me tuba, ‘Mfumu, Mfumu,’ kasi yina ke sala luzolo ya Tata ya Munu.” Oh, beno bika kaka yawu kukota baminuti fyoti. Mu vwandaka zonza na nswalu nyonso na nkokila yayi, na mutindu nyonso, na yawu beto bika yawu kukota kaka baminuti fyoti, beno me mona. “Yandi yina ke sala luzolo ya Tata ya Munu.” “Yandi yina ke vibidila tii na nsuka. Yandi yina ke vibidila!”

260 Kana muntu tuba, “Mu ke kwikila yandi, muntu yina, kele muntu ya luvunu ya ntama.”

261 “Mbote, kana nge banza yawu samu na munu, mu ke bika dibuundu. Mu ke vwanda diaka ve na kima ya kusala na yawu.” Mbote mingi, beno bawu yayi. Beno me mona? Ya ke talisa yina beno me sala. Mpangi-bakala, kana ya vwandaka blé na kubanda, ya ke vwanda blé na nsuka. Beno me bikala kaka ntama mingi ve awa. Ata mbala mosi ve ti beno ke sungika kima yango. Ya kele kieleka.

*Bambuka moyo na yawu kisika nge me kubwa, . . .*

262 Vutuka mpe bambuka moyo ntangu nge vwandaka na nzingulu yina kisika nge zolaka tuba na muntu mosi ve. Kima mosi vwandaka tambula mbote ve na kati ya dibuundu, beno vwandaka ve na zulu ya bimatinu ya mfinangani ya beno kuna samu na kuzonzila dibuundu, mpe kuzonzila muntu yankaka, kudasuka mpe kukwenda kota na dibuundu yankaka. Ve, beno



vwandaka kaka kuna, na mvibudulu mpe sambidilaka yawu, mpe Nzambi nataka yawu, beno me mona.

*Bambuka moyo . . . kisika nge me kubwa, mpe balula ntima, . . .*

263 Beno zaba yinki “beno balula ntima” zola kutuba, mutindu yina ve?

*. . . mpe sala bisalu ya nge ya ntete; . . .*

264 Beno vutuka mpe beno kuzwa nzingulu ya beno ya ntete. Beno sala bima yina beno salaka na mbandukulu. “Mata na autel mpe sungika yawu na Nzambi,” na nzonzolo yankaka. Ya kieleka.

*. . . sala bisalu ya nge ya ntete; to mu ke kwiza na nswalu na nge, mpe mu ke katula mwinda ya nge na kisika ya yawu, kaka kana ti nge balula ntima.*

265 Uh-huh, “Kana ve, nge ke vwanda na dibuundu yina me bukana, mpe ya ke panzana, kana nge balula ntima ve.”

266 “Kasi yayi nge . . .” Oh, ntangu yayi awa beto me kwiza. Beno simba mbote. Beno kuwa na bukebi. Beno lwata kazaka ya beno ya dibuundu ntangu yayi, mpe beno kulumusa mumvudi ya beno. Beno kuwa. Samu . . .

*Kasi yayi kele na nge, ti nge yinaka bisalu ya Nicolaïte, yina mpe mu ke yinaka.*

267 “Nge yina bisalu ya ba-Nicolaïte.” Ntangu yayi beno tala mbote. Yinki vwandaka “bisalu” na Ephèse, na nsungi ya dibuundu yina landaka, vwandaka “malongi.” Beto ke baka yawu, mbasi na nkokila, “ba-Nicolaïte.”

*Mpe yandi yina kele na dikutu, ti yandi kuwa yina Mpeve ke tuba na mabuundu; Na yandi yina ke nunga mu ke pesa muswa ya kudya yinti ya luzingu, yina kele na kati-kati ya paladiso ya Nzambi.*

268 Ntangu yayi, yina ke landa, nzila yina ke landa ke banda na Dibundu ya Smyrne.

269 Ntangu yayi, “Nicolaïte,” ya kele kisika beto ke banda, mbasi na nkokila, ke basika na Apocalypse 13. Kinganga-Nzambi ya ba-Nicolaïte, mutindu ya bandaka kaka kuna na Ephèse. Mpe ya kele kisika nsungi yango ya dibuundu kubwaka, na bamvula bankama tatu ya luzingu ya yawu. Ntete yawu basika na luzingu, ba-Nicolaïte bandaka na kubanda malongi, kinganga-Nzambi ya bampangi.

270 Mpe na yina, ya ntete, ya katukaka na Nicolas, yina vwandaka mosi ya . . . mosi ya . . . mpe yandi . . . Na Actes kapu ya 6, mu banza, mpe nzila ya 5, kisika yandi kwendaka mpe soolaka badiakre. Mpe bawu bakaka yayi, yina vwandaka Nicolas kuna, mpe bandaka kuna mpe bokilaka yawu ba-Nicolaïte, mpe bandaka na kubongisa kinganga-nzambi. Mpe kubanda kuna ya

kumaka “bisalu,” yina bawu vwandaka sala, na kutubaka bima yayi na zulu ya bafunguna, mpe nionso yina. Mpe na yina ya kumaka “malongi” awa, mpe kotaka na Babylone. Mpe sukaka awa, na ntangu ya nsuka, na Buklisto nionso ya kufuka na zulu ya yawu; kaka ndambu yina bikanaka samu na kuzwa mpulusu na yawu. Beno tala mbote mpe beno mona yinki ya kele, mbasi na nkokila, kana Nzambi zola.

<sup>271</sup> Oh, mpangi ya munu ya bakala ya luzolo, mpangi ya munu ya kento ya luzolo, na Yandi yina kele na lenda ya kukanga nge na kubwa, na Yandi yina kele na lenda ya kusimba ntima ya beno na lemvo, ti Yandi tsyamunaka balusakumunu ya Yandi na zulu ya beno. Bika ti beno zimbana ata fioti ve ti beto ke zinga na bilumbu ya nsuka ya nsungi ya dibuundu ya nsuka, kisika ba zabisaka yawu na ntwala samu na kuvwanda nsungi ya dibuundu yina kele tiya ve madidi ve, kaka ndambu ya ntima samu na Yawu. Mpe beno vwanda na kati-kati ya ntima. Beno kwisa na Klisto, na ntima ya beno ya muvimba.

<sup>272</sup> Mu ke tuba na beno ve yinki dibuundu kukota. Yina ke na . . . Nzambi ke yufula beno yawu ata fioti ve na Lusambusu. Ve, tata. Yandi ke kipe ve dibuundu yina beno kele mambele.

<sup>273</sup> Yandi zola *beno*; ya kele muntu mosi. Mpe beno fwana butuka mbala zole mpe kuzwa mbotika ya Mpeve-Santu, to beno me kwenda. Beno me mona? Beno ke bula kaka dibuundu, beno ke na kumekula, tii kuna beno ke kuzwa nzingulu ya kubutuka mbala zole.

<sup>274</sup> Mpe kuna, Yandi yina telamaka kuna, mpe Minda Sambwadi ya Wolo, na nzila ya Bansungi Sambwadi ya Dibundu, mpe Mpeve-Santu mosi yina pesaka Dibundu kuna, ke pelisa Yawu awa.

<sup>275</sup> Ntangu yayi, ya vwandaka na bamekudi mingi na dibuundu yina, mpe yayi ba-Nicolaite kuna, mpe nzila nyonso ya bansungi nyonso ya dibuundu, bantu ya bilanda-landa, tii ya ke kuma na yisi awa tii ya kele kaka na kimvuka mosi ya nene ya organisation. Mpe Nzambi ke basisa nionso yina, mpe ke basisa ndambu ya bantu na Nkembo.

<sup>276</sup> Bika ti Mfumu sakumuna beno. Yayi kele mutindu ya mpasi, bankundi, kasi ya kele mbote. Ya ke sadisa beno mpe ke keba beno na kubwa. Ntangu yayi, beno kwenda ve bisika nyonso, beno tuba, “Mpangi Branham me losa yina na zulu ya dibuundu ya munu.” Ya vwandaka ve samu na dibuundu mosi. Ya vwandaka kaka zola kutuba na beno, mutindu muntu mosi. Mu ve . . .

<sup>277</sup> Kana beno kele ya dibuundu ya ba-Baptiste, na yina beno kele Baptiste ya kieleka ya kifuluka na Mpeve-Santu. Kana beno kele ya dibuundu ya ba-Methodiste, beno vwanda Methodiste ya kieleka ya kifuluka na Mpeve-Santu, nionso yina ya kele. Mpe beno ke vwanda ve ya kubwa na mfuka; beno ke

vwanda na kiyeka ya dibuundu mosi, to na bankalani ya beno, samu na nkembo ya Nzambi.

Bika ti Mfumu sakumuna beno ntangu yayi, na yina beto ke telama, kana beno zola.

<sup>278</sup> Mulongi ya Luzolo ya Luzingu, na manima ya kutanga Ndinga ya Nge, beto me telama na mwa ntangu fioti. Na kuzabaka ti kilumbu mosi kutanga yayi na nkokila yayi ke vwanda . . . Beto ke kuwa Yawu na bande, mutindu ya wandaka, na Kilumbu ya Lufundusu. Yinki beto ke sala samu na yawu? Na kumonaka ti beto ke na kuzinga na nsungi yayi ya nsuka, mpimpa bisika nyonso, wapi ntangu. Beno me mona Nkwizulu ya Mfumu, bidimbu ke na kumonika, “bitembo ya nene ke na kubaluka; bantima ya bantu ke na kubwa, boma; ntangu ya mpasi; kiadi na kati-kati ya bayinsi.”

<sup>279</sup> Bantu mingi ke tubaka, “Oh, mu me kuwaka yawu bamvula mingi.” Kasi Masonuku tubaka ve ti bawu ke tuba yawu, “Ya kele ve na luswaswanu na ntangu yina batata ya beto lalaka”? Na kuzabaka ve ti beto kele kaka ya kukangama. Yandi lendaka kwiza na ntwala ya suka.

<sup>280</sup> Mpe, Tata, wapi kilumbu to wapi ngunga, beto zaba, ti mwa bansinga yayi ya fioti ya luzingu na zulu ya yina beto ke na kutambula ke zengana na yisi ya beto. Mioyo ya beto ya mawa ke kangama kuna na kitezolo, na zulu ya Ndinga ya Nzambi, mpe bakyese ya beto ya yina beto kuwaka mpe kutanga.

<sup>281</sup> Ya me tala beto, Mfumu, na kutelama ntangu yayi mpe kukitala beto mosi. Mpe na yina babakala mpe bakento, bana ya babakala mpe bana ya bakento, kele ya kutelama awa na kati ya kivinga yayi, na nkokila yayi, ya kuvedila mpe ya kutsiema, ti bawu banza na mudindu kaka ntangu yayi. Mpe kana bawu me butuka dyaka ve, bika bawu baka lukanu na kati ya ntima ya bawu na ntangu yayi, “Ata mbala mosi ve ti mu ke kudya to kunwa malafu tii Nge ke fulusa munu na mani yina Nge fulusaka bawu na Kilumbu ya Pantekote. Tii yinza ke kuma ya kufwa, mpe nyonso ya zole kasi Nge, Mfumu ya Munu, mpe zola samu na nyonso yankaka ke zimbana. Kasi katula zola nyonso ya yinza na munu, mpe ti munu katuka kilumbu yayi kuvwanda nyonso ya Nge.” Pesa yawu, Mfumu.

<sup>282</sup> Vwanda na bantu mutindu bawu ke kwendaka na bayinzo ya bawu. Beno bambuka moyo na nsatu, O Nzambi, mputu na yinsi ya beto, bamputu na mpeve, bayina kele na nzala.

<sup>283</sup> Nzambi, telemisa milongi, bisika nyonso. Fulusa bawu na Mpeve-Santu, mpe fidisa bawu, kulonga, Mfumu, mutindu makala ya tiya. Beto zaba ve wapi ngunga . . . Beto ke luta kaka mutindu yayi mbala mosi. Beto kele kaka muntu yina ke kufwa, mpe matondo na Nzambi samu na yawu. Kasi, luzingu yina ke landa, beto ke longa ve Nsangu ya mbote na luzingu yina ke landa yina ke kwisa; kasi beto ke sepela na Nsangu ya mbote,

na bawu ya bansungi yina ndimaka Yawu; na Kapitene ya Yintu, Mfumu ya beto Yesu Yina nionso kele ya kulunga, mpe lukumu nionso kuvwanda na Yandi ntangu nionso mpe kukonda nsuka. Amen.

<sup>284</sup> Nzambi sakumuna beno. Beno baluka mpe pesa mbote na mosi na yankaka, na yina beto ke yimba Nsinga *Ya Ngwisani Kusakumuka*, kana beno zola.

Nsinga ya ngwisani kusakumuka  
Bantima ya beto na zola ya Buklisto;  
Mbundana ya mioyo ya bampangi  
Ya kele mutindu yina na Zulu.

Na ntwala ya Kiti ya kimfumu ya Tata ya beto,

<sup>285</sup> Ntangu yayi, beno pesana mbote mosi na yankaka. Ya kele kaka baminuti kumi, ntangu, samu ti minda ntangu yayi kele na zulu ya kulunga. Beno nionso kupesana mbote, beno vutuka na yinzo, beno sepela, mpe beno vutuka mbasi na nkokila. Na ngunga ya sambwadi na ndambu, ya kieleka, beto ke banda lukutakanu, kana Nzambi zola. Wapi mutindu ya kele mbote...?...

54-0512 Bansungi Sambwadi Ya Dibuundu  
Branham Tabernacle  
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)